

Na osnovu člana 16. stav (4) Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva unutrašnjih poslova, Vlada Zeničko-dobojskog kantona, na 53. sjednici, održanoj 01.11.2024. godine, d o n o s i

ZAKLJUČAK

I.

Utvrđuje se Nacrt Zakona o oružju i municiji.

II.

Nacrt Zakona iz tačke I ovog Zaključka se upućuje u dalju skupštinsku proceduru.

III.

Zaključak stupa na snagu danom donošenja.

Broj: 02-_____/24

Datum, 01.11.2024. godine

Zenica

PREMIJER

Nezir Pivić

DOSTAVLJENO:

1x Ministarstvo unutrašnjih poslova,

1x Stručna služba Skupštine,

1x a/a.

Na osnovu člana 37. stav 1. tačka f) Ustava Zeničko-dobojskog kantona Skupština Zeničko-dobojskog kantona, na ____ sjednici održanoj dana __.__. 2024. godine, d o n o s i

Z A K O N O ORUŽJU I MUNICIJI

DIO PRVI – OSNOVNE ODREDBE

Član 1. (Predmet)

Ovim zakonom utvrđuju se kategorije oružja, uslovi za nabavljanje, držanje, nošenje, i postupanje sa oružjem, bitnim dijelovima i municijom, oduzimanje oružja, bitnih dijelova i municije, osnivanje i vođenje civilnih streljista, trgovina oružjem, bitnim dijelovima i municijom, posredovanje, kao i popravljavanje, prepravljavanje i onesposobljavanje oružja, nadzor nad primjenom ovog zakona, vođenje evidencija, mehanički trag oružja, kaznene i prekršajne odredbe, legalizacija, amnestija kao i druga pitanja od značaja za uređivanje oblasti oružja i municije na području Zeničko-dobojskog kantona (u daljem tekstu Kanton).

Član 2. (Svrha zakona)

Svrha donošenja ovog zakona je usklađivanje propisa iz oblasti nabavke, posjedovanja i nošenja oružja sa Direktivom Vijeća Europe 91/477/EEZ od 18.06.1991. godine o kontroli nabavke i držanja oružja (SL L 256, 03.09.1991.), te Direktivama 2008/51/EZ od 21.05.2008. godine (SL L 179, od 08.07.2008.) i 2017/853 od 17.05.2017. godine (SL L 137, 24.05.2017.) Evropskog parlamenta i Vijeća, kojom se mijenja i dopunjuje Direktiva vijeća 91/477/EEZ o kontroli nabavke i držanja oružja (SL L 179, od 08.07.2008.) i Direktive Evropskog parlamenta i Vijeća Europske unije broj: 2021/555 o nadzoru nabavke i posjedovanja oružja (SL L 115 od 24.03.2021. godine) (u daljem tekstu: Direktive).

Član 3. (Primjena)

- (1) Fizička i pravna lica mogu nabavljati, držati i nositi oružje, bitne dijelove za oružje i municiju, samo pod uslovima utvrđenim ovim zakonom.
- (2) Odredbe ovog zakona u pogledu nabavljanja i držanja oružja, bitnih dijelova i municije odnose se i na strane državljane sa stalnim boravkom ili koji imaju odobren privremeni boravak duži od jedne godine.
- (3) Privremeni boravak duži od jedne godine podrazumijeva kontinuirano produženje privremenog boravka po istom osnovu po kojem je stranom državljaninu odobren privremeni boravak čije produženje traži.
- (4) Lica sa područja drugog entiteta, kantona ili Brčko distrikta Bosne i Hercegovine imaju pravo nošenja oružja u skladu sa odredbama ovog zakona na području Zeničko-dobojskog kantona uz odgovarajuću važeću ispravu za to oružje izdatu od strane nadležnog organa.

Član 4. (Izuzeci od primjene Zakona)

- (1) Odredbe ovog zakona ne odnose se na oružje i municiju za potrebe Oružanih snaga Bosne i Hercegovine, na policijske službenike, službenike sudske policije, pripadnike straže kazneno-popravnih ustanova, zaposlenike Obavještajno-sigurnosne agencije Bosne i Hercegovine,

pripadnike Oružanih snaga Bosne i Hercegovine, kada drže i nose oružje i municiju po propisima svoje službe.

(2) U smislu ovog zakona ne smatra se oružjem:

- a) dekorativno oružje,
- b) imitacije oružja,
- c) oružje koje je trajno onesposobljeno za upotrebu tehničkim postupcima koji su određeni posebnim propisima ili su priznati od strane nadležnog organa,
- d) oružje koje je namijenjeno za alarmiranje i signalizaciju,
- e) oružje koje se koristi u industrijske ili tehničke svrhe pod uslovom da može biti korišteno u samo za to navedene svrhe,
- f) podvodna puška i drugi predmeti, koji snagom opruge napete gume ili sabijenog plina izbacuju osti ili harpun i koji su isključivo namijenjeni ribolovu,
- g) oružje za spasavanje, omamljivanje i usmrćivanje životinja,
- h) municija za vazdušno oružje i
- i) lažna municija.

Član 5.

(Primjena Zakona o upravnom postupku)

Na sva pitanja postupka, koja nisu uređena ovim zakonom, primjenjuju se odredbe Zakona o upravnom postupku ("Službene novine Federacije Bosne i Hercegovine", broj 2/98, 48/99 i 61/22).

Član 6.

(Definicije)

Pojedini pojmovi upotrijebljeni u ovom zakonu imaju sljedeća značenja:

- a) "oružje" je svako vatreno oružje iz tačke b) ovog stava, kao i oružje koje nije vatreno oružje u skladu sa ovim Zakonom i drugim posebnim zakonima u Bosni i Hercegovini;
- b) vatreno oružje je svako prijenosno cijevno oružje koje ispaljuje, služi za ispaljivanje ili se može prepraviti za ispaljivanje sačme, zrna ili projektila djelovanjem zapaljivog potisnog sredstva, osim predmeta koji su izrađeni za uzbuđivanje, signaliziranje, spašavanje života, ubijanje životinja, lov harpunom ili u industrijske ili tehničke svrhe, pod uslovom da se mogu upotrebljavati samo u navedene svrhe i ako se smatraju starim oružjem, s tim da se ne odnose na kategorije iz člana 6. ovog zakona. Smatra se da je neki predmet sposoban za prepravljanje kako bi ispaljivao sačmu, zrno ili projektil djelovanjem zapaljivog potisnog sredstva ako ima izgled vatrenog oružja i ako ga je moguće prepraviti zbog njegove konstrukcije ili materijala od kojeg je izrađen;
- c) bitan dio znači cijev, kućište, uvodnik metaka, uključujući i gornji i donji uvodnik, ako je primjenjivo, vodicica, cilindar, zatvarač ili nosač zatvarača koji je, s obzirom na to da su to odvojeni predmeti, uključen u kategoriju vatrenog oružja na koje su postavljeni ili na koji se namjerava postaviti;
- d) oružje za ličnu zaštitu čine pištolji i revolveri kalibra 4,8 mm i veći;
- e) kratkocijevno vatreno oružje je oružje čija cijev nije duža od 30 cm, a ukupna dužina ne prelazi 60 cm;
- f) dugocijevno vatreno oružje je svako vatreno oružje osim kratkocijevnog vatrenog oružja;
- g) lovačko oružje je vatreno oružje kategorije B sa kojim se smije loviti divljač u skladu sa propisima o lovstvu;
- h) sportsko oružje je vatreno, vazdušno, hladno i oružje s tetivom ili oprugom koje se koristi u

streljaštvu ili drugim sportovima, u skladu sa posebnim propisima;

- i) vatreno oružje sa jednostrukim okidanjem je vatreno oružje koje nema spremnik koje se prije svakog hica puni ručnim ubacivanjem naboja u komoru ili nišu za punjenje na poklopcu cijevi;
- j) automatsko vatreno oružje je svako vatreno oružje koje se nakon hica automatski napuni i koje može ispaliti više od jednog naboja jednokratnim pritiskanjem obarača,
- k) poluautomatsko vatreno oružje je oružje koje je nakon ispaljivanja svakog metka ponovo spremno za ispaljivanje i kod kojeg je iz cijevi jednokratnim pritiskom obarača moguće ispaljivati jedan metak;
- l) vatreno oružje s repetirajućim mehanizmom je oružje kod kojeg je nakon ispaljivanja svakog metka potrebno ručno pomoću mehanizma ubaciti metak u cijev;
- lj) kombinovano oružje je oružje sa dvije ili više olučenih i neolučenih cijevi različitog kalibra;
- m) trofejno oružje je vatreno, vazdušno i hladno oružje koje se čuva kao uspomena iz ranijeg perioda historije Bosne i Hercegovine ili za njegovog vlasnika predstavlja ličnu ili porodičnu uspomenu a koje je trajno onesposobljeno za upotrebu;
- n) staro oružje je oružje koje je proizvedeno prije 1895. godine i/ili oružje koje se puni sa usta cijevi crnim barutom i koje se pali kremenom, fitiljem ili kapislom i koje predstavlja kulturno nasljeđe ili ima historijsku ili umjetničku vrijednost ili služi za umjetničke, kulturne ili druge slične priredbe i koje je onesposobljeno za upotrebu;
- nj) onesposobljeno vatreno oružje je vatreno oružje koje je trajno onesposobljeno za upotrebu, osiguravajući da su svi bitni dijelovi vatrenog oružja postali trajno neupotrebljivi i da ih nije moguće ukloniti, zamijeniti ili modificirati kako bi se vatreno oružje na bilo koji način ponovno osposobilo;
- o) vazdušno oružje su sve vrste pušaka, pištolja, revolvera i druge naprave koje pod pritiskom opruge, vazduha ili drugog gasa izbacuju kroz cijev zrno, kuglicu ili druge projekte;
- p) airsoft i paintball naprave se puške i pištolji, odnosno sportski rekviziti namijenjeni izbacivanju plastičnih, gumenih ili želatinoznih projektila na isti način kao i vazdušno oružje, s tim da mogu imati veći kalibar od vazdušnog oružja i mogu raditi u automatskom režimu i da je energija projektila manja od energije zračnog oružja;
- r) gasno/plinsko oružje su sve vrste pušaka, pištolja, revolveri i druge naprave koje pod pritiskom gasova raspršuju neškodljive nadražljive tvari;
- s) oružje za uzbuđivanje i signalizaciju su naprave s ležištem municije namijenjene samo za ispaljivanje municije bez projektila izazivanjem glasnog pucnja, neškodljivih razdražujućih tvari, drugih aktivnih tvari i pirotehničke municije za signalizaciju te koje se ne može prepraviti za ispaljivanje sačme, zrna ili projektila djelovanjem zapaljivog potisnog sredstva;
- t) konvertibilno oružje je gasno, startno i signalno oružje, kao i svako drugo oružje koje ima cijev i izgledom podsjeća na vatreno oružje i koje se s obzirom na konstrukciju i materijal od koga je napravljeno, može prepraviti tako da ispaljuje bojevu municiju;
- u) hladno oružje je oružje koje ne uključuje vatru ili eksploziju kao rezultat upotrebe baruta ili drugih eksplozivnih materija. U hladno oružje spada ručno-borbeno oružje za blizak kontakt ili bilo koje drugo oružje koje se koristi u direktnoj borbi, odnosno noževi, bodeži, bajoneti i noževi skakavci čije se sječivo nalazi po pritiskom sabijene opruge a iz drške iskaču pod pritiskom na dugme ili polugu, bokseri kao i drugi predmeti pogodni za nanošenje povreda kada se koriste na javnom mjestu;
- v) paradno i akustično oružje je vatreno oružje koje je posebno prepravljeno za isključivu upotrebu ispaljivanja municije bez projektila, za upotrebu u pozorišnim predstavama, fotografiranju, filmskom i televizijskom snimanju, rekonstrukciji povijesnih događaja, povorkama, sportskim događajima i obuci;

- z) reprodukcija oružja su kopije dugog i kratkog vatrenog oružja koje se pune sa usta cijevi crnim barutom i pale fitiljom, kremenom ili kapislom;
- aa) dekorativno oružje (imitacije oružja) su predmeti koji su vanjskim izgledom slični ili jednaki oružju, ali ih nije moguće upotrijebiti niti prepraviti u vatreno oružje;
- ab) registrovano oružje je oružje za koje je izdato odobrenje za držanje oružja ili oružni list;
- ac) municija za vatreno oružje, znači meci kao cjelina ili njegovi sastavni dijelovi, uključujući čahure, inicijalne kapisle, potisno punjenje, zrna ili projekte koji se koriste u vatrenom oružju, a koja se nabavlja na osnovu važeće isprave o oružju;
- ad) lažna municija je municija koja ne sadrži inicijalnu kapislu, barutno punjenje ili eksplozivno punjenje;
- ae) municija sa probojnim učinkom je municija za vojnu upotrebu pri čemu je projektil presvučen košuljicom i ima čvrstu probojnu jezgru;
- af) municija sa eksplozivnim projektilima je vojna municija koja sadrži punjenje koje eksplodira prilikom udara;
- ag) municija sa zapaljivim projektilima je vojna municija kod koje projektil sadrži hemijsku smjesu koja se zapali prilikom dodira sa zrakom ili prilikom udara;
- ah) odobrenje za nabavljanje i posjedovanje vatrenog oružja je isprava o oružju na osnovu koje fizičko ili pravno lice može nabaviti i posjedovati vatreno oružje;
- ai) odobrenje za držanje oružja je isprava o oružju koja se izdaje pravnom licu;
- aj) oružni list je isprava o oružju na osnovu koje se drži, odnosno drži i nosi oružje u skladu sa ovim zakonom i sadrži podatke o oružju (vrsta, marka kalibar i serijski broj vatrenog oružja), podatke o bitnim dijelovima (serijski broj), podatke o vlasniku oružja (ime i prezime, datum i mjesto rođenja, država rođenja, jedinstveni matični broj i adresa stanovanja) datum izdavanja i rok važenja oružnog lista;
- ak) odobrenje za sakupljanje i držanje starog oružja je isprava o oružju koja omogućava fizičkom ili pravnom licu sakupljanje i posjedovanje starog oružja;
- al) kolekcionarska dozvola je isprava za sakupljanje i posjedovanje starog oružja koja se izdaje fizičkom ili pravnom licu koje posjeduje više od deset komada različitog registriranog oružja, bez prava nošenja;
- alj) potvrda o prijavi oružja je isprava koju izdaje nadležna policijska stanica za oružje kategorije C;
- am) potvrda za nošenje oružja i municije je isprava koja se izdaje članu streljačke ili lovačke organizacije ili fizičkom licu koje obavlja poslove zaštite ili čuvaru šuma, lovišta i ribolovišta, u svrhu prenošenja oružja i streljiva;
- an) nadležna policijska stanica je policijska stanica Ministarstva unutrašnjih poslova Zeničko-dobojskog kantona (u daljem tekstu: Ministarstvo) na čijem području podnosilac zahtjeva ima prebivalište, odnosno sjedište;
- anj) vlasnik oružja je fizičko ili pravno lice kojem je izdata odgovarajuća isprava o oružju;
- ao) trgovac oružjem je svako fizičko ili pravno lice čija se trgovina ili poslovanje sastoji u cjelini ili djelimično od trgovine, razmjene, najma, popravka, modifikacije ili prepravljavanja vatrenog oružja ili bitnih dijelova ili/i trgovine, razmjene, modifikacije ili prepravljavanja municije;
- ap) posrednik u prometu oružjem-broker je svako fizičko ili pravno lice, koja nije trgovac oružjem, čija se trgovina ili poslovanje sastoji u cjelini ili djelimično od pregovaranja ili ugovaranja transakcija za kupovinu ili prodaju vatrenog oružja, bitnih dijelova ili municije ili opskrbu njima;

- ar) kolekcionar je svako fizičko ili pravno lice posvećeno prikupljanju i očuvanju vatrenog oružja, bitnih dijelova ili municije u istorijske, kulturne, znanstvene, tehničke i obrazovne svrhe ili svrhe očuvanja nasljeđa;
- as) zaštitari su fizička lica, koja su, u skladu sa odredbama Zakona o agencijama i unutrašnjim službama za zaštitu ljudi i imovine ("Službene novine Federacije BiH" broj: 78/08 i 67/13), u radnom odnosu u agencijama za zaštitu ljudi i imovine ili u pravnim osobama koje su organizovale unutrašnju zaštitarsku službu i koji su angažovani na poslovima fizičke zaštite ljudi i imovine;
- at) korisnici lovišta su pravna lica koja su na osnovu odredbi Zakona o lovstvu ("Službene novine FBiH" broj: 4/06, 8/810 i 81/14) dobila lovište na gospodarenje (lovačka udruženja, privredna društva šumarstva, te ostala pravna lica registrirana za bavljenje lovstvom);
- au) lovočuvari su fizička lica koja u lovočuvarskoj službi u skladu sa Zakonom o lovstvu, obavljaju poslove zaštite i čuvanja lovišta;
- av) čuvari šuma su fizička lica koja u čuvarskoj službi u skladu sa Zakonom o šumama (Službene novine Zeničko-dobojskog kantona" broj: 8/13) obavljaju poslove zaštite i čuvanja šuma i šumskih zemljišta;
- az) zajednički korisnici oružja u smislu ovog zakona su lica koja koriste jedno isto lovačko ili sportsko oružje;
- ba) registrovano oružje je oružje za koje je izdata odgovarajuća isprava o oružju;
- bb) registracija oružja je unos podataka o oružju (vrsta, marka, model kalibar i serijski broj vatrenog oružja, oznaka na njegovom kućištu ili uvodniku metaka i jedinstvena oznaka), podatke o bitnim dijelovima (serijski broj ili jedinstvena oznaka, ako je drugačija od oznake na kućištu ili uvodniku metaka svakog vatrenog oružja) i unos podataka o vlasniku (ime i prezime, ime jednog roditelja, datum i mjesto rođenja, jedinstveni matični broj i adresa stanovanja) u službene evidencije propisane ovim Zakonom, kao i propisima donijetim na osnovu ovog Zakona, uz izdavanje odgovarajuće isprave o oružju;
- bc) držanje oružja podrazumijeva držanje i posjedovanje oružja na osnovu oružnog lista ili odobrenja za držanje oružja;
- bd) prenošenje vatrenog oružja podrazumijeva da se oružje koje se drži na osnovu odobrenja ili odgovarajuće isprave o oružju, uz predhodnu prijavu nadležnoj policijskoj stanici može prenositi u slučaju promjene prebivališta ili boravišta fizičkog lica, odnosno promjene sjedišta pravnog lica, popravke, modifikacije ili prepravke oružja, smrti vlasnika, odlaska u lov, na sportsko takmičenje, na streljiste ili u drugim opravdanim slučajevima;
- be) tehnički pregled vatrenog oružja je pregled koji se obavlja radi provjere tehničke ispravnosti oružja;
- bf) popravljjanje oružja je otklanjanje kvarova na oružju i zamjena ili ugradnja originalnih dijelova;
- bg) modifikacija ili prepravljanje oružja je prilagođavanje oružja drugoj municiji ili svojoj prvobitnoj svrsi, zamjena ili ugradnja bitnih dijelova oružja i drugi zahvati na oružju kojima se utječe na njegovo funkcioniranje ili na tehnička svojstva;
- bh) promet oružja i municije je nabavljanje oružja ili municije radi prodaje, smještaj i čuvanje oružja i municije u svrhu prodaje, te njegova prodaja na malo i veliko u Federaciji Bosne i Hercegovine;
- bi) dobrovoljna predaja oružja, bitnih dijelova i streljiva podrazumijeva jasnu i nedvojbeno izjavu vlasnika ili nekog drugog lica koje ima opravdan interes, da oružje, bitne dijelove i streljivo dobrovoljno predaje nadležnoj policijskoj stanici;
- bj) civilno streljiste je otvoreni ili zatvoreni objekat (streljana) namjenjen sportsko-rekreativnom gađanju koji ispunjava tehničke i sigurnosne uslove za upotrebu registrovanog

- ili prijavljenog oružja;
- bk) muzej je stalna institucija u službi društva i njegovog razvoja, otvorena javnosti, u kojoj se nabavljaju, čuvaju, istražuju i izlažu vatreno oružje, bitni dijelovi ili municija u istorijske, kulturne, znanstvene, tehničke i obrazovne svrhe te svrhe očuvanja nasljeđa ili rekreativne svrhe;
- bl) električni paralizator je ručna naprava koja pomoću visokog električnog napona privremeno onesposobljava lice;
- blj) sprej za omamljivanje je naprava namijenjena civilnom tržištu, koja sadrži i prilikom upotrebe raspršuje nadražujuće hemijske spojeve u koncentracijama dozvoljenim po prihvaćenim međunarodnim standardima;
- bm) optički nišan je naprava kojom se oružju povećava preciznost;
- bn) minsko-eksplozivna sredstva su sve vrste bombi, mina, granata i drugih naprava opremljenih sa eksplozivnom materijom ili detonatorom (težina, udar, potez, trenje, hemijska reakcija, električna energija i sl.) kod kojih dolazi do oslobađanja energije i njihovog rasprskavanja;
- bnj) mužari-prangije su ručne ili samostojeće naprave namjenjene za izazivanje glasnog pucnja, koje su konstruisane tako da ne mogu primiti cjeloviti naboj, pune se s usta cijevi određenom količinom crnog baruta i pale štapinom, kremenom i kapislom, a zatvaraju sredstvom male specifične težine;
- bo) paradno i akustično oružje je vatreno oružje koje je posebno prepravljeno za isključivu upotrebu ispaljivanja municije bez projektila, za upotrebu u pozorišnim predstavama, fotografiranju, filmskom i televizijskom snimanju, rekonstrukciji povijesnih događaja, povorkama, sportskim događajima i obuci;
- bp) posebna oprema za vatreno oružje je svaki mehanizam namijenjen kao dodatak za osnovni model oružja, čijom primjenom se mijenjaju mogućnosti kod upotrebe oružja, osim optičkog nišana;
- br) ispitivanje vatrenog oružja je provjeravanje ispravnosti funkcionisanja oružja i ispravnosti pojedinih dijelova vatrenog oružja, te kontrola izdržljivosti cijevi i drugih odgovarajućih dijelova pod određenim pritiskom;
- bs) obilježavanje žigom vatrenog oružja je utiskivanje propisanih žigova na određene dijelove vatrenog oružja za koje je ispitivanjem utvrđena ispravnost;
- bt) tehnički pregled vatrenog oružja je pregled koji se obavlja radi provjere tehničke ispravnosti oružja;
- bu) mehanički trag oružja je trag koji ostavljaju bitni dijelovi oružja na čahuri i zrnu municije prilikom ispaljenja;
- bv) amnestija lica je oslobađanje od odgovornosti lica za nelegalno posjedovanje oružja kategorije B, prilikom dobrovoljne predaje istog;
- bz) legalizacija oružja je postupak registracije neregistrovanog vatrenog oružja kategorije B koje je lice posjedovalo bez odobrenja za koje nije potrebno dokazivati porijeklo oružja, uz ispunjenost uslova propisanih ovih zakonom.

DIO DRUGI-ORUŽJE I MUNICIJA

POGLAVLJE I-KATEGORIZACIJA ORUŽJA

Član 7. (Kategorizacija oružja)

Oružje se prema ovom zakonu razvrstava u četiri kategorije, i to:

a) Kategorija A, koju čine:

- 1) eksplozivni bojni projektili i bacači,
- 2) automatsko vatreno oružje,
- 3) vatreno oružje koje je skriveno u drugim predmetima,
- 4) municija s probojnim, eksplozivnim ili zapaljivim projektilima, te projektili za takvu municiju,
- 5) municija za pištolje i revolvare koja ima ekspanzijski učinak i meci za takvo streljivo osim municije za lov ili sportsko streljaštvo za lica kojima je dozvoljeno da koriste to oružje,
- 6) automatsko vatreno oružje koje je prepravljeno u poluautomatsko oružje, ne dovodeći u pitanje član 10. stav 5. Direktive,
- 7) bilo koje od sljedećeg poluautomatskog vatrenog oružja sa središnjom udarnom iglom:
 - a) kratko vatreno oružje koje omogućuje ispaljivanje više od 21 naboja bez ponovnog punjenja, ako je spremnik kapaciteta većeg od 20 naboja dio tog vatrenog oružja ili se u njega umeće odvojivi spremnik kapaciteta većeg od 20 naboja,
 - b) dugo vatreno oružje koje omogućuje ispaljivanje više od 11 naboja bez ponovnog punjenja ako je spremnik kapaciteta većeg od 10 naboja dio vatrenog oružja ili se u njega umeće odvojivi spremnik kapaciteta većeg od 10 naboja,
- 8) poluautomatsko dugo vatreno oružje, to jest vatreno oružje izvorno namijenjeno ispaljivanju s ramena koje se može smanjiti na dužinu manju od 60 cm, a da ne izgubi svoju funkciju, i to sklopivim ili teleskopskim nastavkom ili nastavkom koji se može ukloniti bez upotrebe alata,
- 9) svako vatreno oružje u ovoj kategoriji koje je prepravljeno da ispaljuje municiju bez projektila, neškodljive nadražujuće tvari, druge aktivne tvari ili pirotehničku municiju ili u paradno ili akustično oružje,
- 10) posebna oprema za vatreno oružje,
- 11) poluautomatsko vatreno oružje za civilnu upotrebu koje je slično oružju sa automatskim mehanizmom osim onog navedenog u stavu 6), 7) i 8) ovog člana,
- 12) sve vrste oružja sa integralnim prigušivačima, prigušivači namijenjeni oružju i dijelovi za prigušivače,
- 13) ostalo vatreno oružje koje nije obuhvaćeno ostalim kategorijama.

b) Kategorija B, koju čine:

- 1) repetirajuće kratko vatreno oružje,
- 2) jednostrijelno kratkocijevno vatreno oružje sa središnjom udarnom iglom,
- 3) jednostrijelno kratkocijevno vatreno oružje s rubnim paljenjem, ukupne dužine do 28 cm,
- 4) poluautomatsko dugocijevno vatreno oružje kod kojeg spremnik i ležište naboja zajedno primaju više od tri naboja u slučaju vatrenog oružja s rubnim paljenjem, odnosno više od tri ali manje od dvanaest naboja u slučaju vatrenog oružja sa središnjom udarnom iglom,

- 5) poluautomatsko kratkocijevno vatreno oružje, osim onog navedenog u tački 7) podtačka a) kategorije A ovog člana,
 - 6) poluautomatsko dugocijevno vatreno oružje navedeno u tački 7) podtačka b) kategorije A ovog člana, kod kojeg spremnik i ležište naboja ne mogu zajedno primiti više od tri naboja, pri čemu se spremnik može odvojiti, odnosno nije sigurno da se uobičajenim alatom ne može prepraviti u oružje kod kojeg spremnik i ležište naboja zajedno primaju više od tri naboja,
 - 7) repetirajuće i poluautomatsko dugocijevno vatreno oružje sa glatkom cijevi ukupne dužine do 60 cm,
 - 8) svako vatreno oružje u ovoj kategoriji koje je prepravljeno da ispaljuje municiju bez projektila, neškodljive nadražujuće tvari, druge aktivne tvari ili pirotehničku municiju ili u paradno ili akustično oružje,
 - 9) poluautomatsko vatreno oružje za civilnu upotrebu koje je slično oružju sa automatskim mehanizmom osim onog navedenog u tački a) podtačka 6), 7) i 8) kategorije A ovog člana,
 - 10) repetirajuće dugocijevno vatreno oružje, osim onog vatrenog oružja navedenog u tački 7) kategorije B ovog člana,
 - 11) dugocijevno oružje s jednom ili više jednostrijelnih užljebljenih i neolučenih cijevi,
 - 12) poluautomatsko dugocijevno vatreno oružje, osim onog navedenog u kategoriji A,
 - 13) jednostrijelno kratkocijevno vatreno oružje s rubnim paljenjem ukupne dužine najmanje 28 cm,
 - 14) dugo vatreno oružje sa jednostrukim okidanjem i glatkim cijevima.
- c) Kategorija C-koju čine:
- 1) svako vatreno oružje u ovoj kategoriji koje je prepravljeno da ispaljuje municiju bez projektila, neškodljive nadražujuće tvari, druge aktivne tvari ili pirotehničku municiju ili u paradno ili akustično oružje,
 - 2) vatreno oružje razvrstano u kategoriju A ili B ili u ovu kategoriju, koje je onesposobljeno u skladu sa Provedbenom uredbom (EU) 2015/2403,
 - 3) paradno i akustično oružje,
 - 4) oružje sa tetivom čija je sila zatezanja veća od 450 N ili veća, odnosno čija je natezna težina veća od 101 libre/45 kg ili veća,
 - 5) vazdušno oružje čija je kinetička energija 10,5 J ili veća ili je brzina projektila 200 m/s ili veća i kalibra većeg od 4,5 mm,
 - 6) prangija,
 - 7) trofejno oružje,
 - 8) električni paralizatori snage preko 10.000 volti,
 - 9) signalno oružje,
 - 10) Plinsko/gasno oružje i
 - 11) reprodukcije vatrenog oružja.

Član 8. (Ograničenja)

- (1) Oružje iz člana 7. ovog zakona se u pogledu prava i obaveza vlasnika oružja, razvrstava u:
- a) Zabranjeno oružje:
 - 1) oružje i municija kategorije A,

- 2) hladno oružje kojem je osnovna namjena napad ili nanošenje ozljeda,
 - 3) hladno oružje kada se nosi na javnim mjestima,
 - 4) oružje kategorije C kada se koristi za uznemiravanje, napad ili nanošenje ozljeda.
- b) Dozvoljeno oružje za koje je potrebno prethodno odobrenje za nabavljanje i držanje vatrenog oružja od nadležne policijske stanice: oružje kategorije B,
- c) Dozvoljeno oružje za koje je potrebna prijava nadležnoj policijskoj stanici: oružje kategorije C.
- (2) Zabranjeno je nabavljanje, posjedovanje, držanje i nošenje, trgovina i pregovaranje ili ugovaranje transakcija za kupovinu ili prodaju vatrenog oružja, bitnih dijelova i municije ili dogovaranje transfera vatrenog oružja, bitnih dijelova i municije kategorije A, osim ako ovim zakonom nije drugačije predviđeno.
- (3) Nabavljanje i posjedovanje poluautomatskog vatrenog oružja sa središnjom udarnom iglom iz člana 7. tačka 7) Kategorije A može se odobriti sportskim strijelcima ako:
- a) ispunjavaju uslove iz člana 11. ovog zakona,
 - b) aktivno vježbaju za sudjelovanje u streljačkim takmičenjima koje priznaje službeno priznata sportska streljačka organizacija ili međunarodni i službeno priznati sportski streljački savez,
 - c) posjeduju potvrdu službeno priznate sportske streljačke organizacije u kojoj je navedeno da je sportski strijelac član streljačkog kluba i da se redovno, najmanje 12 mjeseci bavi streljaštvom u tom klubu i da vatreno oružje ispunjava tražene specifikacije za streljačku disciplinu koju priznaje međunarodni i službeno priznati sportski streljački savez.
- (4) Zabranjeno je nabavljanje, držanje i trgovina hladnog oružja kojem je osnovna namjena napad ili nanošenje ozljeda, te nošenje takvog hladnog oružja na javnom mjestu, osim u svrhu sportskog takmičenja.
- (5) Zabranjeno je nabavljanje, posjedovanje i nošenje oružja kategorije B bez odgovarajuće isprave o oružju.
- (6) Zabranjeno je držanje ili nošenje oružja kategorije C, bez odgovarajuće potvrde o prijavi oružja.
- (7) Oružje kategorije C mogu nabavljati, držati i nositi samo lica starija od 21 godine.
- (8) Oružje za spasavanje, omamljivanje i usmrćivanje životinja i dijelove za takvo oružje, može nabaviti samo pravno i fizičko lice koje ima registrovanu djelatnost za uzgoj, držanje, čuvanje ili zaštitu životinja.
- (9) Lica mlađa od 18 godina, ne mogu nabavljati, držati i nositi električni paralizator snage ispod 10.000 volti, hladno oružje, vazdušno oružje čija je kinetička energija manja od 10,5 J ili je brzina projektila manja od 200 m/s i kalibra 4,5 mm, oružje sa tetivom čija je sila zatezanja manja od 450 N, odnosno čija je natezna težina manja od 101 libre i airsoft i paintball naprave.
- (10) Izuzetno, sprej za omamljivanje mogu nabavljati, držati i nositi lica starija od 15 godina kao i pravna lica i fizička lica registrovana za obavljanje djelatnosti.
- (11) Naprave s ležištem municije oblikovane tako da mogu ispaljivati samo municiju bez projektila, neškodljive nadražujuće tvari, druge aktivne tvari ili pirotehničko signalnu municiju (oružje za uzbunjivanje i signalizaciju) ne mogu se prepraviti za ispaljivanje sačme, zrna ili projektila djelovanjem zapaljivog potisnog sredstva.
- (12) Zabranjeno je popravljavanje, modifikacija ili prepravljavanje vazdušnog, gasnog airsoft i paintball naprava i reprodukcija oružja, za ispaljivanje bojeve municije, kao i svakog drugog oružja, osim onog navedenog u članu 62. stav (1) ovog zakona.

POGLAVLJE II – NABAVLJANJE ORUŽJA, BITNIH DIJELOVA I MUNICIJE

Član 9. (Isprave)

(1) Isprave o oružju prema ovom zakonu su:

- a) odobrenje za nabavljanje oružja,
- b) oružni list za držanje i nošenje oružja (u daljem tekstu:oružni list),
- c) odobrenje za držanje oružja,
- d) odobrenje za sakupljanje i držanje starog oružja,
- e) odobrenje za držanje trofejnog oružja,
- f) kolekcionarska dozvola i
- g) potvrda o prijavi.

(2) Kao isprave o oružju, u smislu ovog zakona, važe sve isprave o oružju koje su izdate od strane nadležnih organa na teritoriji Bosne i Hercegovine.

Član 10. (Podnošenje i postupak rješavanja zahtjeva)

(1) Zahtjev za izdavanje odobrenja za nabavku i držanje vatrenog oružja, izdavanje i zamjenu isprava o oružju, podnosi se na propisanom obrascu nadležnoj policijskoj stanici Uprave policije Ministarstva unutrašnjih poslova Zeničko-dobojskog kantona prema mjestu prebivališta, odnosno sjedišta podnosioca zahtjeva.

(2) Zahtjev za izdavanje odobrenja za provođenje obuke u rukovanju vatrenim oružjem, odobrenja za obavljanje djelatnosti (trgovina, posredovanje, popravljavanje, prepravljavanje i onesposobljavanje oružja) i odobrenje za osnivanje civilnih strelišta podnosi se nadležnoj policijskoj stanici Uprave policije Ministarstva unutrašnjih poslova Zeničko-dobojskog kantona prema mjestu prebivališta, odnosno sjedišta podnosioca zahtjeva.

(3) Obrazac zahtjeva iz stava (1) ovog člana, kao i svih drugih zahtjeva vezanih za izdavanje isprava o oružju iz člana (9) ovog zakona, te izgled i sadržaj obrazaca isprava o oružju i drugih dokumenata, utvrdiće se pravilnikom koji donosi ministar na prijedlog policijskog komesara.

(4) Postupak rješavanja zahtjeva iz stava (1) i (2) ovog člana uredit će se pravilnikom koji donosi ministar na prijedlog policijskog komesara.

(5) Imenovanje i način rada komisija i drugih učesnika u postupcima rješavanja po zahtjevima iz stava (1) i (2) ovog člana, uredit će se pravilnikom koji donosi ministar na prijedlog policijskog komesara.

Član 11. (Opći i posebni uslovi za izdavanje odobrenja za nabavljanje vatrenog oružja i bitnih dijelova fizičkom licu)

(1) Vatreno oružje iz kategorije B može se nabavljati samo na osnovu odobrenja nadležne policijske stanice.

(2) Odobrenje za nabavljanje oružja iz kategorije B izdaje se fizičkom licu koje ispunjava opšte i posebne uslove.

(3) Opšti uslovi za izdavanje odobrenja za nabavljanje i posjedovanje vatrenog oružja su:

- a) da je lice navršilo 21 godinu života,
- b) da ima opravdani razlog za nabavljanje oružja,
- c) da lice nije osuđivano za krivično djelo, odnosno da se protiv lica ne vodi istraga ili krivični postupak, osim za krivična djela protiv bezbjednosti javnog saobraćaja iz nehata koja za posljedicu imaju tjelesnu povredu ili materijalnu štetu,
- d) da u posljednje dvije godine lice nije kažnjeno za prekršaj protiv javnog reda i mira sa elementima nasilja: učestvovanje u tuči, zlostavljanje ili fizički napad na drugog, izazivanje tuče, zlostavljanja ili fizičkog napada na drugog, narušavanje javnog reda i mira naročito drskim ponašanjem, ugrožavanje sigurnosti, izazivanje osjećaja ugroženosti druge osobe, prijetnjom da će napasti na život ili tijelo, pucanje iz vatrenog oružja, odnosno za prekršaj propisan ovim zakonom za koji je izrečena zaštitna mjera oduzimanje oružja ili za prekršaj sa elementima nasilja propisan drugim zakonom, kao i za vrijeme dok se protiv tog lica vodi postupak za takve prekršaje,
- e) da ne postoje okolnosti koje negativno utiču na javni red i mir, odnosno interese bezbjednosti, kao i da ne postoje druge okolnosti koje ukazuju da bi oružje moglo biti zloupotrijebljeno, kao što je: češće i prekomjerno uživanje alkohola, narkotičkih ili drugih omamljujućih sredstava, poremećeni porodični, susjedski odnosi, sukobi s okolinom, agresivno i ekscenno ponašanje, te drugi poremećaji u ponašanju, teže disciplinske povrede propisa o lovstvu ili sportskom streljaštvu počinjene u posljednje dvije godine, kriminalističko-obavještajni razlozi i razlozi koji ukazuju na povezanost sa licima iz kriminalističko-obavještajne evidencije kao i druge okolnosti koje lice čine nepodobnim za posjedovanje oružja koje ukazuju da bi oružje moglo biti zloupotrebjeno.

(4) Posebni uslovi za izdavanje odobrenja za nabavljanje i posjedovanje vatrenog oružja su:

- a) da je lice zdravstveno sposobno za držanje i nošenje oružja,
- b) da raspolaže tehničkim znanjem i vještinom za pravilno rukovanje oružjem i da poznaje propise koji se odnose na držanje i nošenje oružja,
- c) da ima uslove za siguran smještaj i čuvanje oružja.

(5) Izuzetno, od stava (3) tačka a) ovog člana, odobrenje za nabavljanje, koje ne uključuje kupnju, i posjedovanje vatrenog oružja, može se izdati i licima sa navršenih 18 godina koja po posebnim propisima obavljaju poslove policijskog službenika, službenika sudske policije, pripadnika straže kazneno-popravnih ustanova, zaposlenika Obavještajno-sigurnosne agencije Bosne i Hercegovine, pripadnike Oružanih snaga Bosne i Hercegovine, zaposlenika agencija za zaštitu ljudi i imovine i pravnih lica sa organizovanom unutrašnjom zaštitarskom službom, čuvarima šuma, lovišta i ribolovišta, kao i članovima sportskih streljačkih organizacija koji se aktivno natječu u streljaštvu i licima sa položenim lovačkim ispitom.

Član 12.

(Utvrđivanje uslova za izdavanje odobrenja za nabavljanje vatrenog oružja fizičkom licu)

(1) Fizičko lice ima opravdan razlog iz člana 11. stav (3) tačka b) za nabavljanje kratkog vatrenog oružja kategorije B ako vatreno oružje nabavlja u svrhu lične sigurnosti i zaštite imovine, ukoliko učini vjerovatnim da je njegova imovina, lična i/ili sigurnost članova njegove uže porodice ugrožena ili bi mogla biti ugrožena u tolikoj mjeri da mu za takvo osiguranje treba oružje, i/ili ukoliko zbog naravi posla ili okolnosti pod kojima ga obavlja postoji potreba za nabavljanjem takve vrste oružja.

(2) Fizičko lice ima opravdani razlog za nabavljanje lovačkog oružja ukoliko je član lovačke organizacije i ukoliko ima položen lovački ispit, što se dokazuje uvjerenjem o članstvu u lovačkoj organizaciji čiji je član i uvjerenjem o položenom lovačkom ispitu.

(3) Izuzetno od stava 2) ovog člana, fizičko lice ima opravdani razlog za nabavljanje lovačkog oružja ako mu je to oružje neophodno potrebno za zaštitu imovine u ličnoj svojini, (stada, usjev i sl.) koje je registrovano kao poljoprivrednik.

(4) Fizičko lice ima opravdan razlog za nabavljanje sportskog oružja ukoliko je član sportske streljačke organizacije, što se dokazuje uvjerenjem sportske streljačke organizacije čiji je član.

(5) Nadležna policijska stanica utvrdit će da li su ispunjeni uslovi iz člana 11. stav (3) tačka c) i d) ovog zakona.

(6) Postojanje uslova iz člana 11. stav (3) tačka e) cijeni nadležna policijska stanica na osnovu činjenica sadržanih u službenoj zabilješci koju policijski službenik sastavlja nakon izvršenog traženja i prikupljanja podataka i obavijesti od građana, nadležnih organa, ustanova i institucija.

(7) Ukoliko lice podnosi zahtjev za nabavljanje lovačkog i/ili sportskog oružja, postojanje činjenica o disciplinskim povredama iz člana 11. stav (3) tačka e) podnosilac zahtjeva dokazuje potvrdom koju izdaje lovačka organizacija i/ili sportska streljačka organizacija čiji je član.

(8) Uslov iz člana 11. stav (4) tačka c) nadležna policijska stanica cijeni na osnovu službene zabilješke, koju sačinjava policijski službenik nadležne policijske stanice, nakon što je činjenično stanje utvrdio neposrednim opažanjem u stambenom ili drugom prostoru gdje se oružje drži, koje se nalazi u mjestu prebivališta, odnosno sjedišta vlasnika ili korisnika oružja.

(9) Podnosilac zahtjeva uvjerenja i potvrde kojim dokazuje činjenice iz stava (2), (3), (4) i (7) ovog člana prilaže uz zahtjev za izdavanje odobrenja radi nabavljanja oružja.

(10) Lice koje je jednom položilo ispit o osposobljenosti pravilnim rukovanjem vatrenim oružjem i poznavanju propisa koji se odnose na nabavljanje, držanje i nošenje vatrenog oružja, ne može se više upućivati na takvu provjeru znanja.

(11) Lice koje je položilo lovački ispit ne može se upućivati na obuku iz stava (8) ovog člana i provjeru znanja iz člana 15. stav (1) tačka a) ovog zakona.

(12) Nadležna policijska stanica ovlaštena je u svako doba provjeriti ispunjavanje uslova iz član 11. stav (3) tačke b), c) d) i e) i stava 4) tačka a) kod lica kojima je izdato odobrenje za nabavku vatrenog oružja ili oružni list, ako sazna za okolnosti koje dovode u sumnju daljnje ispunjavanje uslova.

(13) Lovačke i streljačke organizacije su u obavezi da u roku od osam dana od dana prestanka članstva svog člana o navedenom dostave obavijest nadležnoj policijskoj stanici.

(14) Mišljenje o opravdanosti zahtjeva za izdavanje odobrenja za nabavku oružja utvrđuje Komisija od tri člana koju imenuje načelnik nadležne policijske uprave za svaku policijsku stanicu, na temelju činjenica i okolnosti koje je u svom zahtjevu za nabavku oružja naveo podnosilac, kao i činjenica i okolnosti utvrđenih u postupku.

Član 13.

(Dostavljanje dokaza o ispunjavanju posebnih uslova i poznavanje propisa koji se odnose na nabavljanje, držanje i nošenje oružja)

Od podnosioca zahtjeva za kojeg se utvrdi da ispunjava opće uslove iz člana 11. stav (3) ovog zakona, nadležna policijska stanica će zatražiti da u roku od 60 dana dostavi dokaze o ispunjavanju posebnih uslova iz člana 11. stav (4) tačka a) i b) ovog zakona.

Član 14.

(Dokazi o zdravstvenoj sposobnosti za nabavljanje,držanje i nošenje oružja)

(1) Postojanje posebnih uslova iz člana 11. stav (4) tačka a) ovog zakona podnosilac zahtjeva dokazuje uvjerenjem o zdravstvenoj sposobnosti, a lica iz člana 4. stav (1) ovog zakona zdravstvenu sposobnost za nabavljanje, posjedovanje i nošenje oružja dokazuju potvrdom o zaposlenju.

- (2) Uvjerenje i potvrda iz stava (1) ovog člana, u momentu podnošenja zahtjeva, ne mogu biti stariji od šest mjeseci od dana izdavanja.
- (3) Uvjerenje o zdravstvenoj sposobnosti za nabavljanje, posjedovanje i nošenje oružja izdaju ovlaštene zdravstvene ustanove sa liste koju utvrđuje Ministarstvo zdravstva Zeničko-dobojskog kantona po mjestu prebivališta fizičkog lica, u kojem se o podobnosti podnosioca zahtjeva za nabavljanje, posjedovanje i nošenje oružja navode pojedinačna i zaključno mišljenje članova zdravstvene komisije u sastavu ljekara oftamološke, neurološke, psihijatrijske i psihologijske specijalnosti i ljekara specijaliste medicine rada.
- (4) U slučaju da u mjestu prebivališta fizičkog lica nema ovlaštene zdravstvene ustanove za izdavanje uvjerenja o zdravstvenoj sposobnosti, podnosilac zahtjeva takvu vrstu pregleda može obaviti u bilo kojoj ovlaštenoj zdravstvenoj ustanovi Zeničko-dobojskog kantona sa liste koju je utvrdilo Ministarstvo iz stava (3) ovog člana.
- (5) Način i postupak obavljanja zdravstvenih pregleda, popis bolesti i zdravstvenih stanja koja lice čine nepodobnim za držanje i nošenje oružja, način vođenja evidencije i medicinske dokumentacije i sadržaj uvjerenja o izvršenom zdravstvenom prijedlogu, kao i naknade u vezi sa utvrđivanjem zdravstvene sposobnosti utvrdiće se pravilnikom, koji donosi ministar na prijedlog policijskog komesara u saradnji sa Ministarstvom zdravstva Zeničko-dobojskog kantona.
- (6) Uvjerenje o zdravstvenoj sposobnosti iz stava (3) ovog člana izdaje se s rokom važenja od pet godina od dana izdavanja.
- (7) Nadležna policijska stanica rješenjem će uputiti vlasnika oružja na vanredni ljekarski pregled koji će se obaviti u jednoj od ovlaštenih zdravstvenih ustanova iz stava (3) i (4) ovog člana, kada postoje saznanja ili opravdane sumnje da više nije zdravstveno sposoban za držanje i nošenje oružja.
- (8) Vlasnik oružja iz stava (7) ovog člana dužan je u roku od 5 dana od dana prijema rješenja raspoloživo oružje predati nadležnoj policijskoj stanici, a u roku od 8 dana od dana pravosnažnosti rješenja o upućivanju na vanredni ljekarski pregled dostaviti nadležnoj policijskoj stanici uvjerenje o zdravstvenoj sposobnosti za držanje i nošenje oružja.
- (9) Protiv rješenja iz stava (7) ovog člana, vlasnik oružja može izjaviti žalbu policijskom komesaru u roku od 15 dana od dana prijema rješenja, a rješenje policijskog komesara je konačno i protiv rješenja po žalbi se ne može voditi upravni spor.
- (10) Za vlasnika oružja za koga je na zdravstvenom pregledu utvrđeno da je nesposoban za držanje i nošenje oružja ili koji ne dostavi uvjerenje o zdravstvenoj sposobnosti za držanje i nošenje oružja iz stava (8) ovog člana, nadležna policijska stanica donosi rješenje kojim se oduzima oružje, bitni dijelovi, municija i isprave o oružju.

Član 15.

(Dokazi o tehničkom znanju za pravilno rukovanje vatrenim oružjem i poznavanju propisa koji se odnose na nabavljanje, posjedovanje i nošenje vatrenog oružja)

- (1) Ispunjavanje uslova iz člana 11. stav (4) tačka b) ovog zakona za oružje kategorije B, podnosilac zahtjeva dokazuje:
- a) potvrdom o položenom ispitu o osposobljenosti za pravilno rukovanje, držanje i nošenje oružja koju izdaje Komisija za ocjenu osposobljenosti za pravilno rukovanje, držanje i nošenje oružja, koju na prijedlog policijskog komesara imenuje ministar Ministarstva ili
 - b) potvrdom o položenom ispitu o osposobljenosti za pravilno rukovanje, držanje i nošenje oružja koju izdaje sportska streljačka organizacija ili ustanova koja posjeduje odobrenje za provođenje obuke u rukovanju vatrenim oružjem.
- (2) Izuzetno, postojanje uslova iz člana 11. stav (4) tačka b) ovog zakona, dokazuje se:

- a) za lica iz člana 4. stav (1) ovog zakona za vrijeme aktivne službe ili nakon odlaska u penziju potvrdom o zaposlenju, odnosno potvrdom o prestanku radnog odnosa zbog ispunjavanja uslova za penziju ili sporazumnog prekida radnog odnosa;
- b) za bivše pripadnike oružanih snaga Republike Bosne i Hercegovine (ARBiH, HVO, HOS-a i MUP-a RBiH i HZHB), potvrdom o pripadnosti oružanim snagama;
- c) za pripadnike bivše Vojske Federacije Bosne i Hercegovine, za profesionalne pripadnike Oružanih snaga Bosne i Hercegovine, potvrdom o pripadnosti oružanim snagama;
- d) za lica sa završenom obukom za obavljanje poslova fizičke zaštite ili poslova odgovornog lica u agencijama za zaštitu ljudi i imovine ili unutrašnjim službama za zaštitu ljudi i imovine, certifikatom o završenoj obuci, kao i druga lica koja su kroz školovanje i druge vidove obuke osposobljena za pravilno rukovanje oružjem i poznaju propise koji se odnose na držanje, čuvanje i nošenje oružja, odgovarajućom potvrdom,
- e) za lica koja su imala registrovano vatreno oružje, potvrdom/uvjerenjem nadležne policijske stanice kod koje je imao registrovano oružje.

(3) Osposobljavanje lica za pravilno rukovanje vatrenim oružjem i poznavanjem propisa koji se odnose na nabavljanje, posjedovanje i nošenje vatrenog oružja vrši Komisija Uprave policije Ministarstva za provođenje osposobljavanja za pravilno rukovanje vatrenim oružjem i poznavanje propisa koju za svaku policijsku upravu imenuje policijski komesarar.

(4) Ovlaštena organizacija za obuku u pravilnom rukovanju vatrenim oružjem i poznavanjem propisa koji se odnose na nabavljanje, posjedovanje i nošenje vatrenog oružja može biti sportska streljačka organizacija ili ustanova koja ima registrovano sjedište na području Zeničko-dobojskog kantona, ispunjava propisane uslove za provođenje obuke i posjeduje odobrenje nadležne policijske stanice.

(5) Program obuke, osposobljavanje i ocjenu osposobljenosti za rukovanje vatrenim oružjem i poznavanje propisa u vezi držanja, čuvanja i nošenja oružja i municije, imenovanje, sastav i način rada komisija iz stava (1) i (3) ovog člana, kao i način rada sportskih streljačkih, odnosno drugih organizacija ili ustanova iz stava (4) ovog člana koje se odnose na obuku i provjeru tehničkih znanja za pravilno rukovanje, držanje i nošenje oružja, pravilnikom utvrđuje ministar na prijedlog policijskog komesara.

Član 16.

(Odobrenje za provođenje obuke u rukovanju oružjem)

(1) Odobrenje za provođenje obuke u pravilnom rukovanju vatrenim oružjem i poznavanjem propisa koji se odnose na nabavljanje, posjedovanje i nošenje vatrenog oružja sportskim streljačkim organizacijama ili ustanovama nadležna policijska stanica će izdati ako:

- a) je sportska streljačka organizacija ili ustanova upisana u registar kod nadležnog suda,
- b) su ispunjeni prostorni i tehnički uslovi za čuvanje, smještaj i upotrebu oružja i municije, kojom se osigurava da oružje i municija ne dođe u posjed neovlaštenih lica i ne ugrozi sigurnost ljudi i objekta,
- c) ako odgovorno lice organizacije ili ustanove za provođenje obuke u rukovanju oružjem ispunjava uslove iz člana 11. stav (3) tačka a) c), d) i e) i stav (4) tačka a) i b) ovog zakona, a ako će provoditi obuku u rukovanju vatrenim oružjem mora da posjeduje certifikat obrazovne ili stručne ustanove ili druge organizacije ili institucije za certificiranog instruktora za provođenje obuke u rukovanju vatrenim oružjem;
- d) ako zaposleno lice koje će provoditi obuku u rukovanju vatrenim oružjem ispunjava uslove iz člana 11. stav (3) tačka a), c), d) i e) i stav (4) tačka a) i b) ovog zakona i ako posjeduje certifikat obrazovne ili stručne ustanove ili druge organizacije ili institucije za certificiranog instruktora za provođenje obuke u rukovanju vatrenim oružjem.

(2) Zahtjev za izdavanje odobrenja za provođenje obuke će se odbiti ako podnosilac zahtjeva

ne ispunjava uslove iz stava (1) ovog člana.

(3) Odobrenje za provođenje obuke u rukovanju oružjem nadležna policijska stanica će ukinuti ako organizacija ili ustanova za provođenje obuke u rukovanju oružjem prestane ispunjavati uslove iz stava (1) ovog člana.

(4) Postojanje uslova iz stava (1) ovog člana utvrđuje posebna Komisija u skladu sa pravilnikom iz člana 10. stav (4) ovog zakona.

Član 17.

(Odobrenje za nabavljanje i posjedovanje oružja fizičkom licu)

(1) Nadležna policijska stanica rješenjem odobrava fizičkom licu nabavljanje i posjedovanje oružja kategorije B, ukoliko ispunjava opće i posebne uslove iz člana 11. ovog zakona.

(2) Ukoliko fizičko lice ne ispunjava jedan od uslova za nabavljanje i posjedovanje oružja propisanih ovim zakonom, nadležna policijska stanica će rješenjem odbiti zahtjev za izdavanje odobrenja.

(3) Ukoliko se zahtjev za izdavanje odobrenja odbija zbog interesa bezbjednosti, kriminalističko-obavještajnih podataka ili razloga koji ukazuju na povezanost sa licima iz kriminalističko-obavještajne evidencije iz člana 11. stav (3) tačka e) ovog zakona, nadležna policijska stanica nije obavezna navoditi način pribavljanja podataka niti posebno obrazlagati utvrđeno činjenično stanje.

(4) Odobrenje za nabavljanje oružja važi šest mjeseci od dana uručenja.

(5) Odobrenje za nabavljanje lovačkog oružja izdaje se fizičkom licu koje ima položen lovački ispit i član je lovačke organizacije.

(6) Izuzetno od odredbe stava (5) ovog člana, odobrenje za nabavljanje lovačkog oružja može se izdati fizičkom licu kome je držanje i nošenje takvog oružja neophodno radi zaštite imovine u ličnoj svojini (stada, usjev i sl.) koje je registrovano kao poljoprivrednik, kao i streljačkim organizacijama radi upražnjavanja streljačkog sporta.

(7) Odobrenje za nabavljanje sportskog oružja, za koje je po ovom zakonu potrebno odobrenje, izdaje se samo streljačkim organizacijama i njihovim članovima.

(8) Oružje i dijelove za oružje može nabaviti samo lice na čije ime odobrenje glasi.

Član 18.

(Odobrenje za nabavljanje i posjedovanje oružja pravnom licu)

(1) Nadležna policijska stanica izdat će pravnom licu odobrenje za nabavljanje oružja kategorije B ukoliko ispunjava sljedeće uslove:

a) da pravno lice ima opravdan razlog za nabavljanje oružja,

b) da lice zaduženo za sigurnost u pravnom licu ispunjava opće i posebne uslove iz člana 11. ovog zakona, izuzev uslova iz stava (4) tačka c) tog člana.

c) da pravno lice ispunjava uslove iz člana 11. stav (4) tačka c) ovog zakona.

(2) Rješenje kojim je odobreno nabavljanje oružja iz stava (1) ovog člana važi šest mjeseci od dana izdavanja.

(3) Opravdani razlog za nabavljanje oružja ima pravno lice koje je kod nadležnog suda registrovano za obavljanje djelatnosti lova, uzgoja divljači, upravljanje i gazdovanje šumama; sportskog streljaštva; vođenja civilnih strelišta; provođenja obuke u rukovanju vatrenim oružjem, naučnog istraživanja za koje je potrebno oružje, muzeji, agencije za zaštitu ljudi i imovine i pravna lica koja imaju uspostavljenu unutrašnju zaštitarsku službu u skladu sa važećim propisima.

(4) Pravna lica iz stava (3) ovog člana, osim agencije za zaštitu ljudi i imovine i pravnog lica koje ima organizovanu unutrašnju službu zaštite, mogu nabaviti oružje čiji broj zavisi od potrebe i broja zaposlenih lica koja imaju potrebu za korištenje oružja.

(5) Agencijama za zaštitu ljudi i imovine i pravnim licima koja imaju organizovanu unutrašnju zaštitarsku službu, nadležna policijska stanica može izdati odobrenje za nabavljanje i posjedovanje oružja uz predhodnu saglasnost Federalnog ministarstva unutrašnjih poslova.

(6) Pravno lice iz stava (3) ovog člana, koje je registrovano za obavljanje djelatnosti lova i uzgoja divljači, za dobivanje odobrenja za nabavku oružja mora ispunjavati i uslove određene propisima o lovstvu.

(7) Nadležna policijska stanica rješenjem će odbiti zahtjev za izdavanje odobrenja za nabavljanje i držanje oružja pravnom licu ako ne ispunjava jedan od uslova za nabavljanje oružja propisanih ovim zakonom.

Član 19.

(Nabavljanje bitnih dijelova oružja)

(1) Vlasnik oružja može nabavljati bitne dijelove oružja sa označenim fabričkim brojem na osnovu odobrenja nadležne policijske stanice, i to samo za oružje za koje je izdat oružni list, odnosno odobrenje za držanje oružja, a za podnosioca takvog zahtjeva nije potrebno utvrđivati uslove za nabavljanje oružja iz člana 11. stav (3) i (4) ovog zakona.

(2) Vlasnik oružja je dužan prijaviti nabavku bitnih dijelova oružja nadležnoj policijskoj stanici u roku od osam dana od dana nabavljanja.

(3) Vlasnik oružja ima obavezu da neispravn ili dotrajali bitni dio oružja ili zamijenjeni tehnički ispravan dio oružja preda nadležnoj policijskoj stanici prilikom njegove registracije, koja o tome izdaje potvrdu, a podaci o novonabavljenom bitnom dijelu se unose u isprave o oružju i službene evidencije policijske stanice.

(4) Dotrajali i neispravn dio oružja se uništava a postupak uništenja provodi Komisija iz člana 49. stav (8) ovog zakona.

Član 20.

(Nabavljanje municije)

(1) Municija za oružje iz kategorije B može se nabavljati na osnovu oružnog lista i odobrenja za držanje oružja.

(2) Municija za oružje iz kategorije C može se nabavljati na osnovu potvrde o prijavi.

(3) Municija za lovačko i sportsko oružje može se nabavljati na osnovu odobrenja za držanje oružja, odnosno na osnovu dokaza o upisu u sudski registar.

(4) Municija se može nabavljati samo za vrstu oružja za koju lice ima važeću ispravu o oružju, izuzev streljačkih organizacija koje mogu nabavljati različitu municiju za svoje potrebe i potrebe obuke.

Član 21.

(Oružni list)

(1) Za držanje i nošenje oružja kategorije B nadležna policijska stanica fizičkom licu izdaje oružni list.

(2) Vlasnik oružja dužan je, kada drži ili nosi oružje, imati uz sebe oružni list izdat za to oružje i na zahtjev policijskog službenika omogućiti uvid u to oružje i oružni list.

(3) Izdavanje oružnog lista ne može se odbiti licu kome je izdato odobrenje za nabavljanje oružja, osim u slučajevima predviđenim ovim zakonom.

(4) Za isto lovačko ili sportsko oružje mogu se izdati tri oružna lista i potvrde o prijavi koji

glase na različita lica, uz ovjerenu saglasnost vlasnika oružja.

(5) Oružni list izdaje se sa rokom važnosti od pet godina.

(6) Nadležna policijska stanica može i prije isteka roka od pet godina vršiti povremene provjere da li vlasnik oružja ispunjava uslove iz člana 11. ovog Zakona.

(7) Vlasnik oružja dužan je, u roku od 60 dana prije isteka roka važnosti oružnog lista, podnijeti zahtjev za produženje važnosti oružnog lista nadležnoj policijskoj stanici, uz koji prilaže dokaze da je oružje tehnički ispravno, da ispunjava uslov u pogledu zdravstvene sposobnosti za držanje i nošenje oružja, a za lovačko i sportsko oružje i dokaz da je član lovačke i streljačke organizacije. Nadležna policijska stanica utvrđuje da li vlasnik oružja ispunjava uslove propisane u članu 11. stav (3) tačke b), c), d) i e) ovog zakona.

(8) Ako vlasnik oružja prije datuma isteka važnosti oružnog lista ne podnese zahtjev za produženje važnosti oružnog lista, nadležna policijska stanica će istom izdati prekršajni nalog, uz obavezu da u roku od 30 dana od dana dostavljanja prekršajnog naloga, podnese zahtjev za produženje važnosti oružnog lista, uz koji prilaže i dokaz o izvršenoj uplati novčane kazne.

(9) Vlasnik oružja dužan je oružje, bitne dijelove, municiju i oružni list predati nadležnoj policijskoj stanici ukoliko ne ispuni uslove ili ne podnese zahtjev za produženje važnosti oružnog lista u roku iz stava (7) ovog člana, kao i u slučaju nepostupanja po stavu (8) ovog člana.

(10) U slučaju iz stava (9) ovog člana, nadležna policijska stanica je obavezna u roku od 60 dana, donijeti rješenje o oduzimanju oružja, municije i oružnog lista, te postupiti u skladu sa članom 47. ovog zakona.

(11) Protiv rješenja o oduzimanju iz stava (10) ovog člana može se izjaviti žalba policijskom komesaru u roku od 15 dana od dana prijema rješenja i protiv rješenja po žalbi se može voditi upravni spor.

Član 22.

(Odobrenje za držanje oružja pravnom licu)

(1) Za držanje oružja kategorije B nadležna policijska stanica na zahtjev pravnog lica iz člana 18. stav (3) ovog zakona izdaje odobrenje za držanje oružja.

(2) Rukovanje i korištenje oružja pravno lice povjerit će samo punoljetnom licu koje ispunjava opće i posebne uslove propisane članom 11. stav (3) tačka c), d) i e) i stav (4) tačka a) i b) ovog zakona.

(3) Izdavanje odobrenja za držanje oružja ne može se odbiti licu iz stava (1) ovog člana osim u slučajevima predviđenim ovim zakonom.

(4) Agencijama za zaštitu ljudi i imovine, pravnim licima sa organizovanom unutrašnjom zaštitarskom službom, i korisnicima lovišta, nadležna policijska stanica izdat će odobrenje za nabavku i posjedovanje oružja i municije samo ako su organizovane u skladu sa Zakonom o agencijama i unutrašnjim službama za zaštitu ljudi i imovine („Službene novine Federacije Bosne i Hercegovine“, broj 78/08 i 67/13) i Zakonom o lovstvu („Službene novine Federacije BiH“, broj: 4/06, 8/10 i 81/14), a drugom pravnom licu iz člana 18. stav (3) ovog Zakona samo ako je organizovano u skladu sa važećim propisima.

Član 23.

(Žalba)

(1) Protiv rješenja nadležne policijske stanice o odbijanju zahtjeva za izdavanje odobrenja za nabavljanje oružja licima iz člana 17. i 18. ovog zakona, podnosilac zahtjeva može izjaviti žalbu policijskom komesaru u roku od 15 dana od dana prijema rješenja.

(2) Rješenje policijskog komesara je konačno i protiv rješenja po žalbi se ne može voditi upravni spor.

Član 24.

(Odobrenje za držanje trofejnog oružja)

- (1) Nadležna policijska stanica, izdat će odobrenje za držanje trofejnog oružja fizičkom licu koje ispunjava opće i posebne uslove propisane članom 11. ovog zakona.
- (2) Nadležna policijska stanica izdat će odobrenje za držanje trofejnog oružja pravnom licu koje ispunjava uslove propisane članom 18. ovog zakona.
- (3) Fizičko i pravno lice iz stava (1) i (2) ovog člana uz zahtjev za izdavanje odobrenja za držanje trofejnog oružja prilaže potvrdu da je oružje trajno onesposobljeno.
- (4) Vatreno oružje koje je onesposobljeno za upotrebu ne smije se osposobljavati.
- (5) Trofejno oružje može se prodati ili pokloniti drugom licu koje posjeduje odobrenje za držanje trofejnog oružja.
- (6) Zabranjeno je nositi i upotrebljavati trofejno oružje i za ovo oružje nabavljati i držati municiju.
- (7) Odobrenje za držanje trofejnog oružja izdaje se sa rokom važenja od 5 godina.
- (8) Vlasnik oružja dužan je, u roku od 60 dana prije isteka važnosti odobrenja za držanje trofejnog oružja, podnijeti zahtjev za produženje važnosti odobrenja za držanje trofejnog oružja, uz koji prilaže dokaz da je oružje trajno onesposobljeno.
- (9) U postupku rješavanja po zahtjevu iz stava (8) ovog člana, nadležna policijska stanica utvrđuje da li fizičko lice ispunjava uslove iz člana 11. stav (3) tačka c), d) i e) i stava (4) tačka a) i c), odnosno da li pravno lice ispunjava uslove iz člana 18. stav (1) tačke b) i c) ovog zakona.
- (10) U postupku iz stava (8) ovog člana, primjenjuju se odredbe člana 21. stav (8), (9), (10) i (11) ovog zakona.

Član 25.

(Odobrenje za sakupljanje i držanje starog oružja)

- (1) Nadležna policijska stanica, izdat će odobrenje za sakupljanje i držanje starog oružja fizičkom licu koje ispunjava opće i posebne uslove propisane članom 11. ovog zakona i pravnom licu koje ispunjava uslove propisane članom 18. ovog zakona a koja su posvećena prikupljanju i očuvanju vatrenog oružja, bitnih dijelova i municije u istorijske, kulturne, znanstvene, obrazovne ili svrhe očuvanja nasljeđa.
- (2) Pod uslovima iz stava (1) ovog člana, fizičkom i pravnom licu (kolekcionaru) može se izdati kolekcionarska dozvola ako posjeduje najmanje deset komada različitog starog oružja, ukoliko raspolaže prostornim i tehničkim uslovima za smještaj i čuvanje, kojima se obezbjeđuje da oružje i municija ne dođu u posjed neovlaštenih lica.
- (3) Nadležna policijska stanica će rješenjem odbiti zahtjev za izdavanje odobrenja za sakupljanje i držanje starog oružja i municije i zahtjev za izdavanje kolekcionarske dozvole ako podnosilac zahtjeva ne ispunjava uslove iz stava (1) i (2) ovog člana.
- (4) Lice kome je izdato odobrenje za sakupljanje starog oružja, odnosno kolekcionarska dozvola, može pored starog oružja, sakupljati i hladno oružje, automatsko i poluautomatsko oružje i bitne dijelove iz kategorije A, koje više nije u naoružanju oružanih snaga ili policije, a trajno je onesposobljeno za upotrebu, pod uslovom da se drži na mjestu koje je dovoljno udaljeno od naseljenog mjesta, javnih puteva, željezničkih pruga, dalekovoda visokog napona i drugih važnih objekata ili su od tih objekata odvojeni zaštitnim grudobranom ili zidom koji pruža punu zaštitu od eksplozija i požara.
- (5) Kolekcionar kojem je izdato odobrenje za sakupljanje starog oružja, dužan je voditi evidenciju o sakupljenom oružju.
- (6) Zabranjeno je osposobljavati za upotrebu, upotrebljavati staro oružje i za ovo oružje

nabavljati i držati municiju.

(7) Lice koje sakupi staro oružje, dužno je isto prijaviti nadležnoj policijskoj stanici u roku od osam dana od dana sakupljanja, i uz prijavu dostaviti dokaz da je oružje trajno onesposobljeno.

(8) Oružje koje se drži na temelju odobrenja iz stava (1) i (2) ovog člana, može se prodati ili predati licima kojima je izdato odobrenje za sakupljanje i držanje starog oružja, a prodavac oružja je dužan izvršiti odjavu oružja kod nadležne policijske stanice u roku od osam dana od dana prodaje.

(9) Odobrenje za sakupljanje i držanje starog oružja i kolekcionarska dozvola izdaju se s rokom važenja od pet godina.

(10) Vlasnik oružja dužan je, u roku od 60 dana prije isteka važnosti odobrenja za sakupljanje i držanje starog oružja i kolekcionarske dozvole, podnijeti zahtjev za produženje važnosti odobrenja za sakupljanje i držanje starog oružja, uz koji prilaže dokaz da je oružje trajno onesposobljeno.

(11) U postupku rješavanja po zahtjevu iz stava (9) ovog člana, nadležna policijska stanica utvrđuje da li fizičko lice ispunjava uslove iz člana 11. stav (3) tačka c), d) i e) i stava (4) tačka a) i c), odnosno da li pravno lice ispunjava uslove iz člana 18. stav (1) tačke b) i c) ovog zakona.

(12) U postupku iz stava (10) ovog člana, primjenjuju se odredbe člana 21. stav (8), (9), (10) i (11) ovog zakona.

Član 26.

(Odobrenje za nabavljanje i posjedovanje vatrenog oružja, bitnih dijelova i municije radi obavljanja muzejske djelatnosti)

(1) Odobrenje za nabavljanje i posjedovanje vatrenog oružja, bitnih dijelova i municije radi obavljanja muzejske djelatnosti, nadležna policijska stanica izdat će muzeju, kao i pravnom ili fizičkom licu, koji nabavljaju, čuvaju, istražuju i izlažu vatreno oružje, bitne dijelove i municiju u historijske, kulturne, znanstvene, tehničke i obrazovne svrhe, te u svrhe očuvanja naslijeđa ili rekreativne svrhe (muzejski materijal) pod uslovom da:

a) posjeduje rješenje nadležnog Ministarstva kojim je utvrđeno da su ispunjeni uslovi za obavljanje muzejske djelatnosti (muzej, muzejska zbirka, muzejska izložba ili galerija) u pogledu odgovarajućeg muzejskog materijala, prostorija i opreme za obavljanje muzejske djelatnosti i da ima potreban broj stručnih muzejskih radnika u skladu sa Zakonom o muzejskoj djelatnosti ("Službene novine Zeničko-dobojskog knatona" broj: 15/03),

b) fizičko lice, odnosno odgovorno lice u pravnom licu i lice koje neposredno rukuje sa vatrenim oružjem i municijom ispunjava uslove propisane članom 11. stav (3) tačka a), c), d) i e) i stav (4) tačka a) i b) ovog zakona,

c) ima prostor za siguran smještaj i čuvanje oružja i municije.

(2) Pravna i fizička lica iz stava (1) ovog člana mogu nabaviti i držati vatreno oružje kategorije B i C.

(3) Izuzetno, pravnim i fizičkim licima iz stava (1) ovog člana, može se odobriti nabavljanje i držanje vatrenog oružja iz kategorije A pod uslovom da se drže na mjestu koje je dovoljno udaljeno od naseljenog mjesta, javnih puteva, željezničkih pruga, dalekovoda visokog napona i drugih važnih objekata koje bi mogli ugrožavati ili su od tih objekata odvojeni zaštitnim gradobranom ili zidom koji pruža punu zaštitu od požara i eksplozija.

Član 27.

(Oružje sa obavezom prijavljivanja nadležnoj policijskoj stanici)

(1) Fizička i pravna lica mogu bez odobrenja nabavljati i držati oružje kategorije C.

(2) Fizička i pravna lica koja nabave oružje iz stava (1) ovog člana, dužna su isto prijaviti nadležnoj policijskoj stanici u roku od osam dana od dana nabavljanja i uz prijavu dostaviti dokaz o porijeklu oružja.

(3) Za prijavljeno oružje iz stava (1) ovog člana nadležna policijska stanica izdaje potvrdu o prijavi oružja.

(4) Izuzetno od stava (3) ovog člana, nadležna policijska stanica izdaje potvrdu o prijavi za plinsko/gasno oružje fizičkom ili pravnom licu ukoliko ispunjava uslove iz člana 11. stav (3) tačke c) i d) ovog zakona.

(5) Potvrda o prijavi oružja se izdaje na neodređeno vrijeme, a u slučaju promjene vlasništva nad oružjem, vlasnik je dužan u roku od osam dana od dana prenosa prava vlasništva obavijestiti nadležnu policijsku stanicu i vratiti potvrdu o prijavi oružja.

(6) Zamijenjene tehnički neispravne i dotrajale dijelove vazdušnog oružja, vlasnik oružja je dužan uz izjavu datu na zapisnik predati nadležnoj policijskoj stanici radi uništenja, koja će o tome izdati potvrdu, a postupak uništenja provest će komisija iz člana 49. stav (8) ovog zakona.

(7) Oružje iz kategorije C ne smije se prodavati licu koje nije napunilo 21 godinu života.

Član 28. (Optički nišan)

(1) Fizičko lice i pravno lice koje posjeduje registrovano lovačko ili sportsko oružje, koje nabavi optički nišan, dužno je da to prijavi nadležnoj policijskoj stanici najkasnije u roku od 8 dana od dana nabavljanja.

(2) Fizičko lice, streljačka organizacija i organizacija koje gazduje lovištem, dužno je prijaviti nadležnoj policijskoj stanici otuđenje, nestanak ili gubljenje optičkog nišana najkasnije u roku od 8 dana od dana otuđenja, nestanka ili gubljenja optičkog nišana, odnosno od dana kada su saznali za otuđenje, nestanak ili gubljenje optičkog nišana.

Član 29. (Postupanje u slučaju prestanka potrebe za daljim držanjem vatrenog oružja bitnih dijelova i municije)

(1) Pravna lica kod kojih je iz bilo kojih razloga prestala potreba za daljim držanjem oružja, bitnih dijelova i municije, dužni su u roku od osam dana od dana prestanka potrebe za daljim držanjem oružja, bitnih dijelova i municije, nadležnoj policijskoj stanici vratiti odobrenje za držanje oružja, a vatreno oružje bitne dijelove i municiju predati nadležnoj policijskoj stanici.

(2) Fizičko lice uvijek može predati nadležnoj policijskoj stanici oružje, bitne dijelove, municiju i isprave o oružju ako ga ne želi više držati ili nositi iz bilo kojeg razloga.

(3) Za oružje iz stava (1) i (2) ovog člana nadležna policijska stanica izdaje potvrdu.

(4) U slučajevima iz stava (1) i (2) ovog člana, nadležna policijska stanica će postupiti u skladu sa članom 47. ovog zakona.

(5) Oružje od sportske streljačke ili lovačke organizacije koja je prestala sa radom preuzet će nadležna policijska stanica, s kojim će se postupiti u skladu sa članom 49. ovog zakona.

Član 30. (Postupak u slučaju smrti vlasnika oružja)

(1) U slučaju smrti vlasnika oružja, punoljetni član njegove porodice, zakonski zastupnik, staratelj, drugo lice koje je s njim živjelo u zajedničkom domaćinstvu, ili fizičko lice kod kojeg se oružje, bitni dijelovi i municija nalazilo u trenutku smrti vlasnika, dužni su da u roku od 60

dana od dana njegove smrti, a na zahtjev nadležne policijske stanice i prije isteka tog roka, predaju na čuvanje toj policijskoj stanici oružje, municiju i isprave o oružju, o čemu nadležna policijska stanica vodi evidenciju.

(2) Nadležna policijska stanica će odmah po saznanju o smrti vlasnika oružja i prije isteka roka iz stava (1) ovog člana, preduzeti potrebne mjere i radnje na preuzimanju oružja.

(3) Nasljednik oružja i municije dužan je u roku od 6 mjeseci od dana pravosnažnosti rješenja o nasljeđivanju preduzeti jednu od sljedećih mjera: oružje, bitne dijelove i municiju prodati ili pokloniti, podnijeti zahtjev za izdavanje odobrenja za nabavljanje i držanje oružja, odnosno podnijeti prijavu za oružje iz kategorije C, podnijeti zahtjev za izdavanje odobrenja za držanje trofejnog oružja ili predati oružje nadležnoj policijskoj stanici na uništenje bez prava na naknadu.

(4) Ako se oružni list, odnosno odobrenje za držanje oružja ne izda licu iz stava (2) ovog člana ili vlasnik oružja nema nasljednika, nadležna policijska stanica postupit će u skladu sa odredbama člana 47. i 49. ovog zakona.

(5) Izuzetno od stava (3) ovog člana, oružje i municija maloljetnog nasljednika čuvat će se kod nadležne policijske stanice dok ne navršši 21 godinu života.

(6) Nasljednik oružja iz stava (3) ovog člana sa navršenom 21 godinom života dužan je s oružjem postupiti na način propisan stavom (2) ovog člana.

(7) Ukoliko nasljednik oružja u roku od 6 mjeseci od dana pravosnažnosti rješenja o nasljeđivanju ne postupi u skladu sa odredbama iz stava (3) ovog člana, ili ako mu je odbijen zahtjev za izdavanje odobrenja za nabavku oružja, nadležna policijska stanica donijet će rješenje o oduzimanju oružja, municije i oružnog lista, te postupiti u skladu sa odredbama člana 49. ovog zakona.

(8) Prodato ili poklonjeno oružje i bitne dijelove, nasljednik mora objavit u nadležnoj policijskoj stanici u roku od osam dana od dana zaključivanja ugovora o prodaji ili poklonu.

Član 31.

(Obaveza prijavljivanja nabavke oružja)

(1) Fizičko i pravno lice kojem je izdato odobrenje za nabavljanje oružja, dužna su u roku od osam dana od dana izvršene nabavke oružja podnijeti pismeni zahtjev nadležnoj policijskoj stanici radi izdavanja oružnog lista, odnosno odobrenja za držanje oružja.

(2) Fizičko i pravno lice kojem je izdato odobrenje za nabavljanje oružja, a oružje nije nabavilo u roku od šest mjeseci od dana uručjenja odobrenja, dužno je vratiti odobrenje za nabavljanje oružja u roku od osam dana od dana proteka roka nadležnoj policijskoj stanici koja je izdala odobrenje.

(3) Za oružje nabavljeno na osnovu odobrenja nadležna policijska stanica fizičkom licu izdaje oružni list, a pravnom licu odobrenje za držanje oružja.

Član 32.

(Zamjena oružja)

(1) Fizička lica međusobno mogu zamijeniti oružje ako oružni listovi glase na istu vrstu vatrenog oružja.

(2) Zamjenu oružja fizičko i pravno lice mogu izvršiti kod ovlaštenog trgovca oružjem samo za vrstu oružja za koje ima oružni list, odnosno odobrenje za držanje oružja, po sistemu staro za novo.

(3) Lica iz stava (1) i (2) ovog člana, dužna su da u roku od osam dana od dana zamjene oružja o tome obavijeste nadležni organ, predaju isprave o oružju i podnesu zahtjev za izdavanje

novih isprava o oružju.

Član 33. (Prenos prava vlasništva)

(1) Fizičko ili pravno lice mogu prodati ili pokloniti vatreno oružje ili bitni dio oružja samo fizičkom ili pravnom licu koje ima odobrenje za nabavljanje te vrste oružja ili odobrenje za nabavljanje oružja, bitnih dijelova i municije radi prodaje.

(2) Prenos prava vlasništva vrši se na temelju pismeno zaključenog ugovora sa ovjerenim potpisima ugovornih strana kod nadležnog organa.

(3) Fizičko ili pravno lice koje je prodalo ili poklonilo oružje ili bitan dio oružja, dužno je najkasnije u roku od osam dana od dana zaključenja ugovora prijaviti i predati nadležnoj policijskoj stanici isprave o oružju, primjerak ugovora iz stava (2) ovog člana i primjerak odobrenja za nabavku oružja izdatog licu kome je prodao ili poklonio vatreno oružje, ako je za nabavljanje takvog oružja potrebno odobrenje u skladu sa odredbama ovog zakona.

(4) Fizičko i pravno lice može prodati ili pokloniti vatreno i sportsko oružje pravnom licu iz člana 55. ovog zakona, koje je dužno u roku od osam dana obavijestiti nadležnu policijsku stanicu o izvršenom prenosu prava vlasništva.

Član 34. (Oduzimanje odobrenja za nabavljanje i posjedovanje oružja i odbijanje izdavanja oružnog lista i odobrenja za držanje oružja)

(1) Odobrenje za nabavljanje i posjedovanje oružja oduzet će se ako poslije izdavanja odobrenja nastupi neki od razloga iz člana 11. stav (3) tačke b), c), d) i e) i stav (4) tačka a) i c), odnosno člana 18. stav (2) ovog zakona.

(2) O oduzimanju odobrenja za nabavljanje i posjedovanje oružja, nadležna policijska stanica donosi rješenje protiv kojeg se može izjaviti žalba policijskom komesaru u roku od 15 dana od dana prijema rješenja a protiv rješenja po žalbi se može voditi upravni spor.

(3) Nadležna policijska stanica neće izdati oružni list i odobrenje za držanje oružja:

a) za koje se ne može dokazati porijeklo;

b) koje je tehnički neispravno, a nije onesposobljeno,

c) koje prije stavljanja u promet nije označeno jasnom, trajnom i jedinstvenom oznakom koja uključuje naziv proizvođača (njegov svojstveni znak ili robnu marku), zemlju ili mjesto proizvodnje, serijski broj i godinu proizvodnje, ako već nije dio serijskog broja,

d) ako nakon izvršene nabavke oružja nastupi neki od slučajeva koji bi bio u suprotnosti sa uslovima iz člana 11 stav (3) tačke b), c), d) i e) i stav (4) tačka a) i c), odnosno člana 18. stav (2) ovog zakona i ako je podnosilac zahtjeva nabavio oružje nakon isteka roka iz člana 31. stav (2) ovog zakona.

(4) U slučajevima iz stava (3), tačke a), b) i c) ovog člana, nadležna policijska stanica donosi rješenje kojim se odbija zahtjev za izdavanje oružnog lista, odnosno odobrenja za posjedovanje oružja i oduzima oružje i odobrenje za nabavku oružja bez prava na naknadu.

(5) U slučaju iz stava (3) tačka d) ovog člana, nadležna policijska stanica donosi rješenje kojim se odbija zahtjev za izdavanje oružnog lista, odnosno odobrenja za posjedovanje oružja i oduzima oružje i odobrenje za nabavku oružja, sa pravom na naknadu.

(6) Protiv rješenja iz stava (4) i (5) ovog člana, može se izjaviti žalba policijskom komesaru u roku od 15 dana od dana prijema rješenja.

(7) Protiv rješenja po žalbi u slučajevima iz stava (4) ovog člana, ne može se voditi upravni spor.

POGLAVLJE III– POSTUPANJE SA ORUŽJEM I MUNICIJOM

Član 35.

(Postupanje sa oružjem i municijom)

- (1) S oružjem i municijom mora se postupati s naročitom pažnjom.
- (2) Naročita pažnja u postupanju s oružjem i municijom pokazuje se u njegovom pravilnom čuvanju, pravilnom, stručnom i pažljivom rukovanju, nošenju, prenošenju i držanju u ispravnom stanju.
- (3) Fizičko lice dužno je pridržavati se pravila javno istaknutih zabrana o unošenju oružja u određene prostore ili prostorije.
- (4) Fizičko lice ne smije nositi oružje kada je pod uticajem alkohola, opojnih droga ili drugih omamljujućih sredstava odnosno u takvom stanju da nije u mogućnosti shvatiti značenje svog postupanja odnosno vladati svojom voljom.

Član 36.

(Čuvanje oružja i municije)

- (1) Oružje i municija moraju se čuvati tako da nisu dostupni maloljetnom ili drugom neovlaštenom licu, zaključani i odvojeni u fiksnom metalnom ormaru, sefu ili sličnom spremištu koje se ne može otvoriti alatom uobičajene upotrebe.
- (2) Oružje i municija moraju se čuvati u stambenom ili drugom prostoru koji se nalaze u mjestu prebivališta, odnosno sjedišta vlasnika.
- (3) Vlasnici oružja, koji oružje drže na osnovu oružnog lista, dužni su da na poziv nadležne policijske stanice donesu oružje na ispitivanje i tehnički pregled.

Član 37.

(Postupci s oružjem i municijom u slučaju napuštanja mjesta prebivališta)

- (1) Vlasnik oružja, bitnih dijelova i municije koji napušta mjesto prebivališta na vrijeme duže od godinu dana, a oružje, bitne dijelove i municiju koje prema ovom zakonu posjeduje na osnovu oružnog lista ne nosi sa sobom, dužan ga je predati na čuvanje fizičkom licu koje ima odgovarajuću ispravu za tu vrstu oružja i uslove za smještaj i čuvanje oružja, ili ovlaštenom trgovcu oružjem.
- (2) Vlasnik oružja, bitnih dijelova i municije dužan je u slučaju iz stava (1) ovog člana, o predaji oružja i municije na čuvanje, obavijestiti nadležnu policijsku stanicu u roku od osam dana od dana predaje.

Član 38.

(Zabrana nošenja i upotrebe oružja)

- (1) Zabranjeno je nošenje vatrenog, vazdušnog, hladnog oružja i oružja iz kategorije C na javnim, vjerskim i sportskim okupljanjima, u obrazovnim, zdravstvenim i drugim javnim institucijama, ugostiteljskim objektima i prostorima koji se koriste za pružanje ugostiteljskih usluga, kao i prostorima gdje je javno istaknuta zabrana nošenja oružja.
- (2) Odredba stava (1) ovog člana ne odnosi se na sportsko oružje, u slučaju kada se ono nosi radi takmičenja u gađanju.
- (3) Ukoliko se oružje nosi na dozvoljenim mjestima, ne smije biti nošeno na način kojim se može izazvati osjećaj fizičke ugroženosti, uznemirenosti ili negodovanje građana.
- (4) Zabranjena je upotreba oružja na javnom mjestu i drugim mjestima na kojima se upotrebom oružja ugrožava sigurnost ljudi i objekata, te narušava javni red i mir.
- (5) Van lovišta, odnosno strelišta, vatreno i vazdušno oružje mora se držati, odnosno nositi u futrolji i ne smije biti napunjeno.

- (6) Lovačko oružje ne smije se upotrebljavati suprotno propisima o lovstvu i izvan lovišta.
- (7) Sportsko oružje ne smije se upotrebljavati izvan civilnih ili sportskih strelišta ili drugih mjesta koja su određena za vježbe gađanja.
- (8) Električni paralizatori i sprejevi za omamljivanje iz člana 8. stav (9) ovog zakona smiju se upotrebljavati samo za samoodbranu.

Član 39.

(Davanje oružja na poslu i upotrebu)

- (1) Zabranjeno je davanje pištolja i revolvera na poslu drugom licu.
- (2) Lovačko i sportsko oružje mogu se davati na poslu licu koje ima oružni list ili potvrdu o prijavi za vrstu oružja koje se daje na poslu.
- (3) Oružje iz stava (2) ovog člana ne smije se davati na poslu maloljetnoj osobi.
- (4) Izuzetno od stava (2) ovog člana, sportske streljačke organizacije ili ustanove mogu davati na upotrebu vazdušno oružje i oružje sa tetivom iz člana 8. stav (9) ovog člana, licima koja nisu članovi streljačkih organizacija i djeci starijoj od 11 godina na sportskim streljštima i na drugim mjestima određenim i uređenim za vježbe gađanja pod nadzorom trenera koji ispunjava opće i posebne uslove iz člana 11. stav (3) tačke a), c), d) i e) i stav (4) tačka a) i b) ovog zakona i uslove propisane posebnim propisom o sportu, uz saglasnost oba roditelja, zakonskih zastupnika, staratelja ili usvojioca djeteta.

Član 40.

(Povjeravanje nošenja oružja)

- (1) Pravno lice koje drži oružje i municiju na osnovu člana 22. ovog zakona, može povjeriti nošenje tog oružja i municije članu lovačke ili streljačke organizacije, odnosno fizičkim licima koja obavljaju poslove čuvanja šuma, lovišta ili ribolovišta ili poslove zaštite i koja ispunjavaju uslove za nošenje oružja propisane ovim zakonom, Zakonom o šumama, i Zakonom o agencijama i unutrašnjim službama za zaštitu ljudi i imovine.
- (2) Lice iz stava (1) ovog člana, kojem je oružje povjereno može ga koristiti i rukovati s njim samo za vrijeme obavljanja poslova u objektu, odnosno na prostoru na kome se obavlja djelatnost, a u vremenskom periodu kad se oružje ne koristi, čuva se na bezbjednom mjestu tako da pristup tom oružju ne mogu imati neovlaštena lica.
- (3) Izuzetno od stava (2) ovog člana, čuvari usjeva i šuma i čuvari lovišta i ribolovišta koji ne stanuju na području koje čuvaju, mogu iznositi oružje i van tog područja i nositi ga do svog mjesta stanovanja, a čuvari stada, kao i lica koja obezbjeđuju imovinu koja se prevozi ili prenosi, mogu nositi oružje prilikom obezbjeđenja te imovine, odnosno kad je to neophodno u vezi sa obezbjeđenjem te imovine.
- (4) Pravno lice iz stava (1) ovog člana, izdaje posebnu potvrdu licu kome povjerava oružje i o tome je dužno obavijestiti nadležnu policijsku stanicu kod koje je oružje registrovano u roku od 48 sati od dana izdavanja.
- (5) Obrazac i sadržaj obrasca potvrde iz stava (4) ovog člana, propisuje pravilnikom ministar na prijedlog policijskog komesara.

Član 41.

(Upotreba sportskog oružja)

- (1) Streljačke organizacije mogu davati na upotrebu oružje i municiju samo svojim članovima i to za vrijeme dok vrše vježbe gađanja ili se takmiče u gađanju na streljštu i na drugom terenu određenom za vršenje vježbi gađanja, odnosno takmičenja u gađanju, te licima koja se obučavaju za rukovanje vatrenim oružjem.
- (2) Ako se magacin oružja streljačke organizacije ne nalazi na streljštu, članovi streljačke organizacije moraju za nošenje oružja do streljšta ili do drugog terena određenog za vršenje

vježbi gađanja, odnosno takmičenja u gađanju, imati potvrdu streljačke organizacije o vršenju vježbi gađanja, odnosno takmičenja u gađanju i člansku iskaznicu izdatu od strane streljačke organizacije.

(3) Potvrda iz stava (2) ovog člana važi samo za dane kada se vrši vježba gađanja, odnosno takmičenje u gađanju.

Član 42.

(Davanje na poslugu lovačkog oružja)

(1) Organizacija koja gazduje lovištem kao i njihovi članovi mogu, radi odstrela divljači, članovima domaćih i inostranih lovačkih organizacija ukoliko isti ispunjavaju uslove propisane članom 39. stav (2) ovog zakona, dati na poslugu lovačko oružje i municiju najduže osam dana, i to samo za lov u određenom lovištu, za koji mora pribaviti prethodnu saglasnost nadležne policijske stanice.

(2) Za oružje i municiju izdatu na poslugu u smislu stava (1) ovog člana, organizacija koja gazduje lovištem izdaje potvrdu za nošenje oružja i municije, u skladu sa članom 40. stav (6) ovog zakona.

(3) Lice kome je dato oružje i municija na poslugu prema odredbama stava (1) i (2) ovog člana, ne smije iznositi oružje i municiju van lovišta kojim gazduje organizacija iz stava (1) ovog člana.

(4) Oružje i municiju, koje su dobili članovi domaćih i inostranih lovačkih organizacija na poslugu od organizacija ili članova iz stava (1) ovoga člana, dužni su isto vratiti sa neutrošenom količinom municije.

Član 43.

(Postupanje u slučaju nestanka ili krađe oružja, bitnih dijelova i isprava o oružju)

(1) Vlasnik oružja koji drži i nosi registrovano oružje i oružje koje je nabavljeno na osnovu odobrenja za nabavljanje oružja a koje nije registrovano u roku iz člana 31. stav (1) ovog zakona, u slučaju nestanka ili krađe oružja, bitnih dijelova i municije ili isprave o oružju, dužan je prijaviti nestanak ili krađu oružja, bitnih dijelova i municije ili isprava o oružju najkasnije u roku od 24 sata od dana saznanja nestanka ili krađe.

(2) Vlasnik oružja dužan je nestanak ili krađu isprava o oružju, osim odobrenja za nabavljanje oružja, o vlastitom trošku oglasiti u "Službenim novinama Federacije BiH".

(3) Ukoliko se u roku od 30 dana od dana objavljivanja u "Službenim novinama Federacije BiH" ne pronađe isprava o oružju, nadležna policijska stanica donosi rješenje o poništenju isprave o oružju, a vlasnik oružja je dužan da po pravosnažnosti rješenja o poništenju isprave o oružju podnese zahtjev za izdavanje nove isprave o oružju.

(4) Prijava iz stava (1) ovog člana podnosi se nadležnoj policijskoj stanici prema mjestu događaja ili saznanja o gubljenju ili krađi oružja i municije. Prijava mora sadržavati okolnosti pod kojima su oružje i municija izgubljeni ili ukradeni.

(5) U slučaju nestanka ili krađe oružja i bitnih dijelova, vlasnik oružja predaje ispravu o ružju u nadležnu policijsku stanicu odmah, a najkasnije u roku od osam dana od dana saznanja za nestanak ili krađu.

Član 44.

(Pronalazak oružja ili municije)

(1) Ko nađe oružje, bitne dijelove ili municiju ili sazna za sakriveno oružje ili municiju, dužan je o tome, odmah, obavijestiti najbližu policijsku stanicu.

(2) Ukoliko se vlasnik nađenog oružja, bitnog dijela ili municije, ne javi u roku od godine dana od dana pronalaska oružja, a za isto nema saznanja da je predmet ili sredstvo izvršenja krivičnog djela ili prekršaja, nađeno oružje i municiju će uništiti komisija iz člana 49. stav (8) ovog zakona.

Član 45.

(Obaveza prijave promjene prebivališta, ličnog imena, naziva i gubitak državljanstva)

- (1) Vlasnik oružnog lista, odnosno odobrenja za posjedovanje oružja, koji promijeni prebivalište, odnosno sjedište, dužan je da se u roku od 30 dana od dana nastale promjene prijavi nadležnoj policijskoj stanici na čijem području je novo prebivalište, odnosno sjedište, radi upisa u evidenciju o izdatim oružnim listovima, odnosno o izdatim odobrenjima za držanje oružja.
- (2) Vlasniku oružja sa područja drugog kantona, entiteta i Brčko distrikta Bosne i Hercegovine koji prijavi prebivalište na području Kantona izdaje se novi oružni list.
- (3) Kada vlasnik oružja, koji prema odredbama ovog zakona posjeduje oružje, promijeni lično ime, odnosno naziv, dužan je o tome obavijestiti nadležnu policijsku stanicu u roku od 30 dana od dana te promjene, radi upisa u službene evidencije i isprave o oružju.
- (4) Kada fizičkom licu pravosnažnom presudom prestane državljanstvo, dužno je u roku od 30 dana od pravosnažnosti odluke predati oružje i oružni list nadležnoj policijskoj stanici, koja ima obavezu u roku od 60 dana donijeti rješenje o oduzimanju oružja, bitnih dijelova, municije i oružnog lista, te postupiti u skladu sa članom 47. ovog zakona.

Član 46.

(Dotrajalo oružje i bitni dijelovi)

- (1) Vlasnik oružja čije je oružje dotrajalo u tolikoj mjeri da njegova upotreba može ugroziti bezbjednost građana, a ne postoji mogućnost da se oružje popravi ili prepravi, dužan je takvo oružje predati nadležnoj policijskoj stanici i podnijeti zahtjev da se briše iz evidencije o nabavljenom oružju.
- (2) Oružje iz stava (1) ovog člana prima se uz izjavu stranke datu na zapisnik, da se oružje predaje bez naknade, a postupak uništenja provest će Komisija iz člana 49. stav (8) ovog zakona.
- (3) Sa zamijenjenim tehnički neispravnim bitnim dijelovima vatrenog oružja postupa se u skladu sa stavom (1) i (2) ovog člana.
- (4) Oružje iz stava (1) ovog člana kao i dijelovi iz stava (3) ovog člana, uništavaju se u skladu sa članom 49. ovog zakona.

POGLAVLJE IV - ODUZIMANJE ORUŽJA, BITNIH DIJELOVA I MUNICIJE

Član 47.

(Oduzimanje registrovanog oružja, bitnih dijelova i municije)

- (1) Oružje, bitni dijelovi, municija i oružni list, odnosno odobrenje za držanje oružja, rješenjem će se oduzeti od vlasnika ako nastupi neki od razloga iz člana 11. stav (3) tačke b), c), d) i e) i stav (4) tačka a) i c), člana 18. stav (1), člana 21. stav (7) i (8) ovog zakona i člana 27. stav (4), kao i u slučaju kada se u njihovom posjedu zatekne spremnik koji se može pričvrstiti na poluautomatsko ili repetirajuće vatreno oružje sa središnjom udarnom iglom i koji može primiti više od 20 nabojia ili u slučaju dugog vatrenog oružja može primiti više od 10 nabojia.
- (2) Sportskom strijelcu će se oduzeti poluautomatsko vatreno oružje sa središnjom udarnom iglom iz člana člana 7. tačka 7) Kategorije A, ako prestane ispunjavati uslove iz člana 8. stav (3) ovog zakona.
- (3) U slučajevima iz stava (1) ovog člana, vatreno oružje, bitni dijelovi i municija se oduzimaju kada im se ne može dokazati porijeklo, kada nije obilježeno oznakom u skladu sa članom 34. stav (3) tačka c) ovog zakona, kao i trofejno oružje i staro oružje.
- (4) Protiv rješenja o oduzimanju iz stava (1) i (2) ovog člana, može se izjaviti žalba

policijskom komesaru u roku od 15 dana od dana prijema rješenja.

(5) Žalba na rješenje iz stava (3) ovog člana ne odgađa izvršenje.

(6) Protiv rješenja po žalbi može se voditi upravni spor.

Član 48.

(Oduzimanje neregistrovanog oružja i municije)

(1) Nadležna policijska stanica rješenjem će oduzeti oružje i municiju od fizičkog lica, državnih organa, ustanova i drugih pravnih lica koji nabave oružje ili municiju bez propisanog odobrenja za nabavljanje ili drže oružje bez oružnog lista, odnosno bez propisanog odobrenja za držanje.

(2) Protiv rješenja o oduzimanju iz stava (1) ovog člana može se izjaviti žalba policijskom komesaru u roku od 15 dana od dana prijema rješenja koja ne odlaže izvršenje.

(3) Protiv rješenja po žalbi ne može se voditi upravni spor.

(4) Oružje i municija iz stava (1) ovog člana oduzimaju se bez prava naknade i isto se uništava u skladu sa članom 49. stav (8) ovog zakona.

Član 49.

(Postupak sa predatim i oduzetim oružjem, bitnim dijelovima i municijom)

(1) Oduzimanje oružja, bitnih dijelova, municije, oružnog lista, odobrenja za držanje oružja i potvrde o prijavi u svim slučajevima predviđenim ovim zakonom, vrši nadležna policijska stanica.

(2) Za oduzeto oružje, bitne dijelove, municiju i isprave iz stava (1) ovog člana, izdaje se potvrda.

(3) Izvršno rješenje nadležne policijske stanice o oduzimanju oružja, bitnih dijelova i municije, izvršava policijski službenik Ministarstva, bez donošenja zaključka o dozvoli izvršenja.

(4) U slučaju da vlasnik vatrenog oružja ne preda oružje, bitne dijelove i municiju policijskom službeniku iz stava (3) ovog člana, nadležna policijska stanica protiv istog podnijet će izvještaj o počinjenom krivičnom djelu zbog nelegalnog držanja i nošenja oružja i municije.

(5) Po pravosnažnosti rješenja o oduzimanju oružja, bitnih dijelova i municije iz člana 47. ovog zakona, nadležna policijska stanica pozvat će vlasnika oružja da u roku od šest mjeseci nađe kupca za oduzeto oružje i municiju, pa ako vlasnik u propisanom roku ne nađe kupca, oduzeto oružje i municija će se prodati putem licitacije.

(6) Prihod od prodatih predmeta će ići u korist budžeta Kantona, a u slučaju nemogućnosti prodaje oduzeto oružje, bitni dijelovi i municija će biti uništeni.

(7) Odredbe stavova (5) i (6) primjenjuju se i na oružje za koje je prestala potreba držanja, a predato je od strane fizičkog ili pravnog lica nadležnoj policijskoj stanici.

(8) Postupak uništenja i prodaje oduzetog oružja, bitnih dijelova i municije sprovodi posebna komisija koju obrazuje na prijedlog policijskog komesara ministar Ministarstva.

(9) Komisija iz stava (8) ovog člana, o uništenju oduzetog oružja, bitnih dijelova i municije sačinjava zapisnik koji se ulaže u spis.

(10) Sa oružjem i municijom oduzetim u pravosnažno okončanom prekršajnom ili krivičnom postupku Komisija će postupiti u skladu sa odlukom nadležnog suda.

(11) Za oružje o kojem nije odlučeno u sudskom postupku i za koje se ne može utvrditi porijeklo, ili koje prije stavljanja u promet nije obilježeno jedinstvenom oznakom u skladu sa posebnim propisima nadležna policijska stanica će donijeti rješenje o uništavanju oružja.

(12) Predato i oduzeto oružje, bitni dijelovi i municija u svim slučajevima predviđenim ovim zakonom, može se čuvati u depozitu nadležne policijske stanice maksimalno pet godina od

dana predaje ili oduzimanja oružja, municije ili predmeta, odnosno od dana pravosnažnosti rješenja o oduzimanju oružja, municije ili predmeta, s kojim će se nakon proteka navedenog roka postupiti u skladu sa odredbom stava (6) ovog člana.

Član 50.

(Privremeno oduzimanje oružja, bitnih dijelova, municije i isprava o oružju)

(1) Policijski službenik od vlasnika oružja privremeno oduzima oružje, bitne dijelove za oružje, municiju i isprave o oružju ako postoje osnovi sumnje da je vlasnik oružja izvršio krivično djelo odnosno prekršaj određen ovim zakonom, da je s oružjem izvršeno krivično djelo ili prekršaj ili su pribavljeni krivičnim djelom ili prekršajem ili su nastali izvršenjem krivičnog djela ili prekršaja kao i ostalo oružje iz člana 7. ovog zakona koje nabavi, drži i nosi protivno odredbama ovog zakona.

(2) Oružje, bitni dijelovi za oružje, municija i isprave o oružju oduzimaju se odmah i prije pokretanja upravnog, prekršajnog i krivičnog postupka, ako se radi o okolnostima koje ukazuju da bi oružje moglo biti zloupotrijebljeno, a naročito češće i prekomjerno uživanje alkohola, uživanje narkotičkih ili drugih omamljujućih sredstava, te preduzimanje hitnih mjera radi zaštite od nasilja u porodici, ili zbog zaštite javnog reda i mira i sigurnosti građana, koje se ne mogu odlagati, a činjenice na kojima treba biti utemeljeno rješenje utvrđene su ili bar učinjene vjerovatnim.

(3) U slučajevima iz stava (1) i (2) ovog člana, policijski službenik nadležne policijske stanice izdaje potvrdu o privremenom oduzimanju predmeta.

(4) Oružje, bitni dijelovi, municija i isprave o oružju iz stava (1) i (2) ovog člana deponuju se u nadležnoj policijskoj stanici koja ih je privremeno oduzela, a ukoliko se u postupku utvrdi da vlasnik nije krivično, odnosno prekršajno odgovoran, vraća se vlasniku.

POGLAVLJE V - CIVILNA STRELIŠTA

Član 51.

(Uvjeti za osnivanje civilnih strelišta)

(1) Civilna strelišta za obavljanje sportske i druge djelatnosti mogu osnovati pravna lica koja nakon upisa u sudski registar, odnosno fizička lica koja nakon registracije za obavljanje takve djelatnosti, dobiju odobrenje nadležne policijske stanice i nadležnog organa iz oblasti prostornog planiranja i urbanizma kojom se odobrava lokacija civilnog strelišta.

(2) Odobrenje iz stava (1) ovog člana nadležna policijska stanica će izdati ako:

a) su ispunjeni prostorni i tehnički uvjeti za čuvanje, smještaj i upotrebu oružja i municije, kojima se obezbjeđuje da oružje i municija ne dođu u posjed neovlašćenih lica i ne ugrozi bezbjednost ljudi i objekata,

b) odgovorno lice i lice koje neposredno rukuje oružjem na civilnom strelištu ispunjava uvjete iz člana 11. stav (3) tačke a), c) d) i e) i stav (4) tačka a) ovog zakona i ako posjeduju sertifikat obrazovne ili stručne ustanove ili druge odgovarajuće organizacije ili institucije za certificiranog instruktora za vatreno oružje ili certificiranog instruktora za provođenje obuke u rukovanju vatrenim oružjem i

c) imaju pravo vlasništva ili pravo korištenja objekta (otvorenog i/ili zatvorenog) i poslovnog prostora koji će biti u funkciji civilnog strelišta.

(3) Odredbe ovog zakona ne primjenjuju se na lovačka strelišta koja se upotrebljavaju za gađanje i isprobavanje lovačkog oružja svojih članova prema propisima o lovstvu.

(4) Odobrenje za osnivanje civilnog strelišta nadležna policijska stanica će ukinuti i zabraniti dalje obavljanje djelatnosti, ukoliko pravno ili fizičko lice iz stava (1) ovog člana, prestane da

ispunjava neki od uslova iz stava (2) ovog člana.

Član 52.

(Utvrđivanje uvjeta za osnivanje civilnih strelišta)

(1) Prostorni i tehnički uslovi za čuvanje, smještaj i upotrebu oružja i municije na civilnim strelištima, broj i vrsta oružja u vlasništvu civilnog strelišta, način korištenja oružja i municije na civilnom strelištu i vođenje civilnog strelišta uredit će se pravilnikom koji donosi ministar Ministarstva na prijedlog policijskog komesara.

(2) Uslove iz člana 51. stav (2) ovog zakona, utvrđuje Komisija u skladu sa pravilnikom iz člana 10. stav (4) ovog zakona.

(3) Izvještaj o utvrđenom stanju komisija dostavlja rukovodiocu nadležne policijske stanice koji donosi rješenje o odobrenju ili odbijanju zahtjeva.

(4) Protiv rješenja iz stava (3) ovog člana može se izjaviti žalba policijskom komesaru u roku od 15 dana od dana prijema rješenja.

Član 53.

(Upotreba oružja na civilnom strelištu)

(1) Na civilnom strelištu samo fizičko lice kojem je izdata isprava o oružju može vršiti gađanje, svojim vlastitim ili oružjem u vlasništvu strelišta na kojem vrši gađanje.

(2) Članovi sportskih streljačkih organizacija uz predočavanje odgovarajućeg dokaza o članstvu u sportskoj streljačkoj organizaciji, mogu na civilnom strelištu koristiti vatreno oružje i municiju koji su vlasništvo sportskih streljačkih organizacija, kao i oružje i municiju koji su vlasništvo osnivača civilnog strelišta.

(3) Fizičko lice kojem nije izdata isprava o oružju može vršiti gađanje pod nadzorom ovlaštenog lica civilnog strelišta, isključivo sa oružjem i municijom koja je vlasništvo civilnog strelišta.

(4) Ovlašteno lice civilnog strelišta će zabraniti izvođenje gađanja i pristup licima iz stava (1), (2) i (3) ovog člana, ako njihovo ponašanje ukazuje da su pod dejstvom alkohola, opojnih droga ili drugih omamljujućih sredstava, odnosno da su u takvom stanju da nisu u mogućnosti shvatiti značenje svog postupanja ili ako njihovo psihofizičko stanje ukazuje na nesposobnost rukovanja oružjem.

Član 54.

(Nabavka oružja i municije za potrebe civilnog strelišta)

(1) Nabavljanje vatrenog oružja za potrebe civilnog strelišta vrši se na osnovu izdatog odobrenja za osnivanje civilnog strelišta.

(2) U slučaju prestanka rada civilnog strelišta ili u slučaju prestanka ispunjavanja uslova za osnivanje i rad civilnih strelišta, nadležna policijska stanica donosi rješenje o oduzimanju oružja, bitnih dijelova, municije i isprava o oružju.

POGLAVLJE VI - TRGOVAC ORUŽJEM I POSREDNIK

Član 55.

(Trgovina oružjem, bitnim dijelovima i municijom)

(1) Trgovinom oružja, bitnim dijelovima i municijom kategorija B i C mogu se baviti pravna lica koja nakon upisa u sudski registar, odnosno fizička lica, koja nakon registracije za obavljanje takve djelatnosti, za to dobiju odobrenje nadležne policijske stanice.

(2) Odobrenje iz stava (1) ovog člana nadležna policijska stanica će izdati:

a) ako su ispunjeni prostorni i tehnički uslovi za smještaj i čuvanje kojima se obezbjeđuje da oružje, bitni dijelovi za oružje i municija ne dođu u posjed neovlaštenih lica i ne ugroze bezbjednost ljudi i objekata,

b) ako lice koje neposredno rukuje oružjem, dijelovima za oružje i municijom kod pravnog lica ili fizičko lice iz stava (1) ovog člana, ispunjava uslove propisane članom 11. stav (3) tačka a), c), d) i e) i stav (4) tačka a) i b) ovog zakona,

c) ako pravno ili fizičko lice ima pravo vlasništva ili pravo korištenja poslovnog prostora u kome će se obavljati trgovina oružjem, bitnim dijelovima i municijom.

(3) Postojanje uslova iz stava (2) ovog člana utvrđuje posebna Komisija u skladu sa pravilnikom iz člana 10. stav (4) ovog zakona.

(4) Zahtjev za izdavanje odobrenja za obavljanje djelatnosti iz stava (1) ovog člana će se odbiti ako podnosilac zahtjeva ne ispunjava uslove iz stava (2) ovog člana.

(5) Nadležna policijska stanica ukinut će odobrenje iz stava (1) ovog člana ako pravno lice, odnosno lice koje neposredno rukuje oružjem, dijelovima za oružje i municijom kod tog lica ili fizičko lice, prestanu ispunjavati jedan od uslova iz stava (2) ovog člana.

Član 56.

(Odobrenje za nabavljanje oružja, bitnih dijelova i municije radi prodaje)

(1) Trgovac oružjem, vatreno oružje, bitne dijelove i municiju može nabavljati na osnovu odobrenja za nabavljanje radi dalje prodaje.

(2) Odobrenje iz stava (1) ovog člana, u formi rješenja izdaje nadležna policijska stanica za svaku ugovorenu količinu oružja, bitnih dijelova i municije i važi šest mjeseci od dana izdavanja.

(3) Zahtjev za izdavanje odobrenja iz stava (1) ovog člana podnosi se nadležnoj policijskoj stanici prema mjestu sjedišta trgovca oružjem i sadrži: naziv i adresu trgovca oružjem (kupac), naziv i adresu pravnog lica od koga se oružje nabavlja (prodavac), vrstu, količinu i kalibar oružja, bitnih dijelova za oružje i municije i naziv i adresu proizvođača.

(4) Odobrenje za nabavljanje oružja, bitnih dijelova i municije iz stava (1) ovog člana neće se izdati ako zahtjev ne sadrži sve potrebne elemente iz stava (3) ovog člana i ako postoje okolnosti koje ukazuju na ugrožavanje opšte sigurnosti građana.

Član 57.

(Prodaja oružja, bitnih dijelova i municije na malo)

(1) Trgovac oružjem iz člana 55. ovog zakona može prodavati oružje:

a) kategorije B fizičkim i pravnim licima i kojima je nadležna policijska stanica izdala odobrenje, uz obavezu da u roku od pet dana od dana prodaje oružja i bitnih dijelova o tome pismeno obavijesti nadležnu policijsku stanicu koja je izdala odobrenje i

b) kategorije C uz obavezu da u roku od osam dana od dana prodaje oružja i bitnih dijelova o tome pismeno obavijesti nadležnu policijsku stanicu .

(2) Prilikom prodaje oružja, trgovac oružjem dužno je da zadrži jedan primjerak odobrenja za nabavljanje oružja, a na drugi primjerak stavi zabilješku o izvršenoj prodaji i ovjeri je štambiljem i potpisom ovlaštenog lica.

(3) Trgovac oružjem može prodavati municiju pod uslovima iz člana 20. ovog zakona, uz obavezu da roku od osam dana od dana prodaje municije o tome obavijesti nadležnu policijsku stanicu.

Član 58.

(Odobrenje za posredovanje)

(1) Pregovaranjem ili ugovaranjem transakcija za kupovinu ili prodaju vatrenog oružja, bitnih dijelova ili municije, mogu se baviti pravna lica koja nakon upisa u sudski registar odnosno

fizička lica koja nakon registracije za obavljanje takve djelatnosti, za to dobiju odobrenje od nadležne policijske stanice.

(2) Odobrenje iz stava (1) ovog člana izdaje se za svako ugovoreno posredovanje oružja, bitnih dijelova ili municije i važi šest mjeseci od dana izdavanja.

(3) Odobrenje iz stava (1) ovog člana izdat će se ako:

a) podnositelj zahtjeva priloži rješenje o upisu u sudski registar, odnosno odobrenje za rad nadležnog općinskog/gradskog organa i ugovor o posredovanju kojim se posrednik obavezuje da drugu ugovornu stranu (nalogodavca) dovede u vezu sa nekim trećim licem radi zaključivanja ugovora;

b) fizičko lice, odnosno odgovorno lice u pravnom licu, kao i lica zaposlena kod pravnog ili fizičkog lica iz stava (1) ovog člana, ispunjavaju uslove iz člana 11. stav (3) tačke a), c), d) i e) i stav (4) tačke a) i b) ovog zakona.

(4) Postojanje uslova iz stava (3) ovog člana utvrđuje posebna Komisija u skladu sa pravilnikom iz člana 10. stav (4) ovog zakona.

(5) Nadležna policijska stanica odbit će zahtjev za izdavanje odobrenja za posredovanje ako podnositelj zahtjeva ne ispunjava jedan od uslova iz stava (3) ovog člana ili ako bi se time ugrozila javna sigurnost.

(6) Nadležna policijska stanica oduzet će odobrenje iz stava (2) ovog člana ako posrednik prestane ispunjavati jedan od uslova iz stava (3) ovog člana.

(7) Posrednik je dužan voditi registar o zaključenim ugovorima o posredovanju u vezi transakcija za kupovinu ili prodaju vatrenog oružja, bitnih dijelova ili municije, zajedno sa podacima na osnovu kojih se omogućava identifikacija i praćenje vatrenog oružja i bitnih dijelova, posebno njihova vrsta, marka, model, kalibar i serijski broj, te nazivi i adrese dobavljača i osoba koje ga nabavljaju.

Član 59.

(Obaveze trgovca oružjem i posrednika i odgovornost ugovornih strana)

(1) Trgovci oružjem i posrednici ovlašteni za promet oružja, bitnih dijelova i municije i posrednici dužni su odbiti svaku transakciju, za kupovinu ili prodaju vatrenog oružja, bitnih dijelova i municije ili opskrbu njima, kao i pregovaranje ili ugovaranje transakcija za kupovinu ili prodaju vatrenog oružja, bitnih dijelova ili municije, opskrbu njima ukoliko iz bilo kojih razloga posumnjaju u porijeklo ili ispravnost oružja, bitnih dijelova i municije, ili je opravdano smatraju sumnjivom zbog njezine prirode i opsega, te su o navedenom dužni odmah obavijestiti nadležnu policijsku stanicu.

(2) Odgovornost ugovornih strana utvrđuje se prema općim pravilima obligacionog prava.

Član 60.

(Čuvanje i držanje oružja od strane trgovca oružjem)

(1) Trgovac oružjem koji se bavi prometom oružja, bitnih dijelova i municije i koji drži oružje i municiju na osnovu ovog zakona, dužan je da oružje i municiju drži i čuva u skladu sa ovim zakonom i drugim propisima.

(2) Način i uslovi za čuvanje i siguran smještaj oružja i municije uredit će se pravilnikom koji donosi ministar na prijedlog policijskog komesara.

POGLAVLJE VII – POPRAVLJANJE I PREPRAVLJANJE ORUŽJA I MUNICIJE

Član 61.

(Uslovi za obavljanje djelatnosti popravljavanja i prepravljavanja oružja)

(1) Popravljanjem i prepravljanjem oružja mogu se baviti pravna lica koja nakon upisa u sudski registar odnosno fizička lica koja nakon registracije za obavljanje takve djelatnosti, za to dobiju odobrenje nadležne policijske stanice.

(2) Odobrenje iz stava (1) ovog člana nadležna policijska stanica će izdati:

a) ako su ispunjeni prostorni i tehnički uslovi za smještaj i čuvanje kojima se obezbjeđuje da oružje, bitni dijelovi za oružje i municija ne dođu u posjed neovlaštenih lica i ne ugroze bezbjednost ljudi i objekata,

b) ako je lice koje vrši popravljavanje i prepravljanje oružja, kod pravnog lica, odnosno fizičko lice iz stava (1) ovog člana punoljetno, ako ispunjava uslove propisane članom 11. stav (3) tačka c), d) i e) i stav (4) tačka a) i b) ovog zakona i ima položen majstorski ispit za zanimanje puškar,

c) ako pravno ili fizičko lice ima pravo vlasništva ili pravo korištenja poslovnog prostora u kome će se obavljati popravljavanje i prepravljanje oružja i bitnih dijelova.

(3) Postojanje uslova iz stava (2) ovog člana utvrđuje posebna Komisija u skladu sa pravilnikom iz člana 10. stav (4) ovog zakona.

(4) O svakoj izvršenoj popravci ili prepravci pravno lice ili fizičko lice vlasniku oružja izdaje potvrdu i u roku od 48 sati u pismenoj formi obavještava nadležnu policijsku stanicu.

(5) Nadležna policijska stanica po prijemu obavijesti o izvršenoj popravci ili prepravci, unosi podatke u isprave o oružju i evidencije.

(6) Odobrenje iz stava (1) ovog člana će se ukinuti ako pravno i fizičko lice iz stava (1) ovog člana prestanu ispunjavati uslove iz stava (2) ovog člana.

Član 62.

(Oružje koje može biti predmet popravljavanja i prepravljanja)

(1) Pravno i fizičko lice iz člana ovog zakona mogu primiti radi popravljavanja i prepravljanja samo oružje za koje je izdat oružni list, odnosno odobrenje za držanje oružja.

(2) Naprava sa ležištem municije oblikovana tako da može ispaljivati samo municiju bez projektila, neškodljive nadražujuće tvari, druge aktivne tvari ili pirotehničku signalnu municiju ne može se prepraviti za ispaljivanje sačme, zrna ili projektila djelovanjem zapaljivog potisnog sredstva.

POGLAVLJE VIII- ONESPOSABLJAVANJE ORUŽJA

Član 63.

(Uslovi za onesposobljavanje oružja)

(1) Onesposobljavanjem oružja mogu se baviti pravna lica koja nakon upisa u sudski registar, odnosno fizička lica registrovana za obavljanje takve djelatnosti, za to dobiju odobrenje nadležne policijske stanice.

(2) Odobrenje iz stava (1) ovog člana će se izdati ako:

a) podnosilac zahtjeva priloži dokaz o pravu vlasništva ili pravu korištenja poslovnog prostora u kojem će se obavljati onesposobljavanje oružja,

b) podnosilac zahtjeva priloži dokaz o položenom majstorskom ispitu za zanimanje puškar,

c) su ispunjeni prostorni i tehnički uslovi za smještaj i čuvanje kojima se osigurava da oružje, bitni dijelovi za oružje i municija ne dođu u posjed neovlaštenih lica i ne ugroze bezbjednost ljudi i objekata,

d) fizičko lice, odnosno odgovorno lice u pravnom licu, kao i lice koje neposredno rukuje

oružjem, ispunjavaju uslove iz člana 11. stav (3) tačke a), c), d) i e) i stav (4) tačke a) i b) ovog zakona.

(3) Postojanje uslova iz stava (2) ovog člana utvrđuje posebna Komisija u skladu sa pravilnikom iz člana 10. stav (4) ovog zakona.

(4) Nadležna policijska stanica odbit će zahtjev za izdavanje odobrenja iz stava (1) ovog člana ako podnosilac zahtjeva ne ispunjava uslove iz stava (2) ovog člana.

(5) Odobrenje za onesposobljavanje oružja će se oduzeti i zabraniti dalje obavljanje djelatnosti ako pravno i fizičko lice iz stava (1) ovog člana prestane ispunjavati uslove iz stava (2) ovog člana.

Član 64.

(Oružje koje može biti predmet onesposobljavanja)

U smislu ovog zakona, predmet onesposobljavanja može biti sljedeće vatreno oružje:

- a) pištolji (jednostrijelni, poluautomatski);
- b) revolveri (uključujući revolvere koji se pune na bubnju);
- c) jednostrijelno dugocijevno vatreno oružje (koje se ne puni prelamanjem);
- d) vatreno oružje koje se puni prelamanjem (npr. sa glatkom cijevi, užlijebljenom cijevi, kombinacijom glatke i užlijebljene cijevi, s padajućim ili okretnim blokom, kratkocijevno i dugocijevno vatreno oružje);
- e) repetirajuće dugocijevno vatreno oružje (sa glatkom ili užlijebljenom cijevi);
- f) poluautomatsko dugocijevno vatreno oružje (sa glatkom ili užlijebljenom cijevi);
- g) automatsko vatreno oružje (npr. jurišne puške, strojnice i kratke strojnice, automatski pištolji);
- h) vatreno oružje koje se puni sa usta cijevi uključujući oružje koje se puni prelamanjem (osim revolvera koji se pune na bubnju).

Član 65.

(Prijava onesposobljenog vatrenog oružja i izdavanje potvrde)

(1) Pravno lice i fizičko lice registrovano za obavljanje djelatnosti iz člana 63. ovog zakona, dužno je da o onesposobljavanju vatrenog oružja u roku od 48 sati obavijesti nadležnu policijsku stanicu.

(2) Obavijest iz stava (1) ovog člana sadrži: datum prijema oružja radi onesposobljavanja, podatke o vlasniku oružja (ime i prezime, odnosno naziv i ID pravnog lica, datum i mjesto rođenja, država rođenja, jedinstveni matični broj i adresa prebivališta, odnosno sjedišta vlasnika oružja), podatke o oružju (vrsta, marka, model, kalibar, serijski broj oružja i oznaku na njegovom kućištu ili uvodniku metaka), podatke o bitnim dijelovima (serijski broj i jedinstvenu oznaku), podaci o ispravi o oružju (serijski broj isprave, datum izdavanja i naziv organa koji je izdao ispravu), naznaku da je oružje onesposobljeno u skladu sa tehničkim specifikacijama vatrenog oružja, datum preuzimanja oružja, serijski broj i datum izdavanja lične karte vlasnika oružja i naziv organa koji je izdao ličnu kartu, datum deaktivacije i identitet deaktivacijskog centra.

(3) Uprava policije vršit će provjere da li je vatreno oružje onesposobljeno u skladu sa tehničkim specifikacijama za onesposobljavanje vatrenog oružja, utvrđenih pravilnikom o onesposobljavanju vatrenog oružja, koji donosi ministar na prijedlog policijskog komesara.

(4) Ako je onesposobljavanje vatrenog oružja provedeno u skladu sa tehničkim specifikacijama za onesposobljavanje vatrenog oružja, Uprava policije vlasniku vatrenog oružja izdaje potvrdu

o onesposobljavanju vatrenog oružja.

(5) Potvrda iz stava (4) ovog člana sadrži: naziv pravnog ili fizičkog lica koje je izvršilo onesposobljavanje, datum izdavanja potvrde, podaci o onesposobljenom vatrenom oružju i bitnim dijelovima (proizvođač, vrsta, tip, marka, fabrički broj i kalibar).

(6) Vlasnik onesposobljenog vatrenog oružja potvrdu iz stava (5) ovog člana čuva trajno.

(7) Ako je onesposobljeno vatreno oružje stavljeno u promet, uz njega se prilaže potvrda o onesposobljavanju.

Član 66.

(Označavanje onesposobljenog vatrenog oružja)

(1) Onesposobljeno vatreno oružje, označava se zajedničkom jedinstvenom oznakom kako bi se naznačilo da je onesposobljeno u skladu sa tehničkim specifikacijama utvrđenim u pravilniku o onesposobljavanju vatrenog oružja.

(2) Prilikom onesposobljavanja vatrenog oružja izvorni serijski brojevi vatrenog oružja moraju biti sačuvani.

(3) Uprava policije na sve bitne dijelove koji su prepravljani radi onesposobljavanja vatrenog oružja stavlja oznaku koja se sastoji od: oznaka deaktivacije "D", ISO oznaka "BA", simbol subjektivne verifikacije "ZDK" i godina verifikacije.

POGLAVLJE IX - NADZOR

Član 67.

(Nadzor koji provodi nadležna policijska stanica)

(1) Nadležna policijska stanica, ako drugim zakonom nije drugačije određeno, vrši neposredni nadzor nad trgovinom, držanjem i nošenjem oružja i municije, čuvanjem i smještajem oružja i municije od strane fizičkih i pravnih lica koja se bave prometom oružja i municije, posredovanjem, sportskim streljačkim organizacijama, organizacijama koje gazduju lovištem, civilnim streljima, agencijama za zaštitu ljudi i imovine, unutrašnjim službama zaštite, sportskim streljačkim organizacijama odnosno ustanovama koje obavljaju obuku za rukovanje oružjem, fizičkim i pravnim licima koji se bave popravljanjem, prepravljanjem i onesposobljavanjem oružja, sakupljanjem i držanjem starog oružja i kolekcionarstvom, kao i nadzor nad vođenjem evidencija propisanim ovim zakonom.

(2) Pravna i fizička lica dužna su omogućiti obavljanje nadzora i dati na uvid traženu dokumentaciju, kao i pružiti potrebne podatke i obavijesti.

(3) Nadzor iz stava 1) ovog člana provodi Komisija za nadzor koju imenuje policijski komesar Uprave policije.

(4) Imenovanje, sastav, nadležnost, način rada, kao i druga pitanja od značaja za rad Komisije iz stava (3) ovog člana, propisuju se pravilnikom koji donosi ministar na prijedlog policijskog komesara.

(5) U obavljanju nadzora Komisija iz stava (3) ovog člana je ovlaštena da:

a) prati i nadzire primjenu ovog zakona i podzakonskih akata donesenih u skladu sa ovim zakonom,

b) prikuplja neophodne podatke, sačinjava izvještaje i informacije koje podnosi policijskom komesaru,

c) pregleda i kontroliše skladišta oružja i municije, civilna streljista, sportske streljačke organizacije odnosno ustanove gdje se obavlja obuka za rukovanje oružjem i druge prostorije gdje se drži i čuva oružje i municija, obavlja trgovina, popravljanje i prepravljanje, onesposobljavanje oružja, vrši nadzor nad postupanjem sa oružjem i municijom i vrši uvid u

propisane evidencije i ostale dokumentacije u vezi sa držanjem, sakupljanjem, kolekcionarstvom i čuvanjem oružja i municije, trgovinom, posredovanjem, popravljanjem i prepravljanjem i onesposobljavanjem vatrenog oružja, osposobljavanjem lica za rukovanje vatrenim oružjem kao i vođenjem civilnih strelišta,

d) predloži privremenu zabranu obavljanja čuvarske službe, trgovine, posredovanja, popravljanja i prepravljanja i onesposobljavanja oružja, te upotrebu civilnih strelišta osposobljavanje lica za rukovanje oružjem i naredi da se utvrđene nepravilnosti otklone u određenom roku;

e) predloži zabranu obavljanja čuvarske službe, trgovine, posredovanja, popravljanja i prepravljanja i onesposobljavanja oružja, osposobljavanja lica za rukovanje vatrenim oružjem, te upotrebu civilnog strelišta ako utvrdi da je u obavljanju tih poslova utvrđen teži propust u preduzimanju zaštitnih ili drugih sigurnosnih mjera, ili druge teže kažnjive radnje ili ukoliko je prestao jedan od uslova pod kojima je odobrenje izdato ili ako se ne postupi po nalogu nadležnog organa,

f) predloži preduzimanje i drugih mjera.

POGLAVLJE X - EVIDENCIJE

Član 68.

(Evidencije nadležne policijske stanice)

(1) Nadležna policijska stanica vodi evidencije o:

a) izdatim odobrenjima za nabavljanje vatrenog oružja,

b) izdatim oružnim listovima,

c) izdatim odobrenjima za držanje oružja,

d) izdatim odobrenjima za držanje trofejnog oružja,

e) izdatim odobrenjima za sakupljanje i držanje starog oružja i izdatim kolekcionarskim dozvolama,

f) izdatim potvrdama za prijavljeno oružje,

g) o optičkim nišanima,

h) o izdatim odobrenjima za držanje oružja pravnim licima,

i) o oduzetom, predatom i nađenom oružju i municiji,

j) o nestalom oružju i municiji,

k) o oružju i municiji predatom na čuvanje,

l) o popravljenom i prepravljenom oružju,

lj) o onesposobljenom oružju,

m) o vlasnicima oružja,

n) izdatim odobrenjima za nabavljanje i držanje vatrenog oružja, bitnih dijelova i municije radi obavljanja muzejske djelatnosti,

- n) izdatim odobrenjima za nabavljanje oružja za potrebe civilnih strelišta,
 - o) izdatim odobrenjima za nabavljanje oružja za potrebe streljačkih organizacija ili ustanova koje posjeduju odobrenje za provođenje obuke u rukovanju vatrenim oružjem,
 - p) izdatim odobrenjima za trgovinu oružjem, bitnim dijelovima i municijom,
 - r) izdatim odobrenjima za nabavljanje vatrenog oružja, bitnih dijelova i municije radi prodaje,
 - s) izdatim odobrenjima za popravljavanje i prepravljavanje oružja,
 - t) izdatim odobrenjima za posredovanje,
 - u) izdatim odobrenjima za onesposobljavanje oružja,
 - v) izdatim potvrdama o onesposobljenom vatrenom oružju,
 - z) izdatim odobrenjima za osnivanje civilnog strelišta,
 - aa) izdatim odobrenjima za provođenje obuke u rukovanju oružjem,
 - ab) mehaničkom tragu vatrenog oružja,
 - ac) predatom vatrenom oružju po amnestiji,
 - ad) dobrovoljno predatom vatrenom oružju, bitnim dijelovima i municiji kategorije A.
- (2) Evidencije iz ovog člana čuvaju se trajno.
- (3) Obrasci, sadržaj i način vođenja evidencija iz ovog člana utvrđuju se pravilnikom koji donosi ministar Ministarstva na prijedlog policijskog komesara.

Član 69. **(Evidencije pravnih i fizičkih lica)**

- (1) Pravna i fizička lica, kao i sportske streljaške organizacije i lovačke organizacije vode evidencije o:
- a) nabavljenom oružju kategorije B i C,
 - b) izdatim potvrdama za nošenje oružja i municije,
 - c) članstvu i prestanku članstva.
- (2) Trgovac oružjem i pravno ili fizičko lice registrovano za obavljanje djelatnosti popravljanja ili prepravljanja dužni su voditi evidencije o:
- a) nabavljenom oružju, bitnim dijelovima i municiji,
 - b) prodatom oružju i municiji,
 - c) popravljenom i prepravljenom oružju i municiji,
 - d) oružju i municiji predatom na čuvanje.
- (3) Posrednik je dužan voditi posebnu knjigu o zaključenim ugovorima o posredovanju u vezi transakcija za kupovinu ili prodaju vatrenog oružja, bitnih dijelova i municije, ili opskrbu njima.
- (4) Pravno lice koje se bavi onesposobljavanjem oružja ili fizičko lice registrovano za obavljanje djelatnosti onesposobljavanja oružja dužno je voditi evidenciju o onesposobljenom oružju.
- (5) Pravno lice koje bavi vođenjem civilnog strelišta ili fizičko lice registrovano za obavljanje

djelatnosti vođenja civilnog strelišta, dužno je voditi evidenciju o :

- a) nabavljenom oružju i municiji,
- b) registrovanom oružju koje je u vlasništvu strelišta,
- c) o korištenom oružju koje se upotrebljava prilikom gađanja;
- d) o utrošenoj municiji,
- e) o licima koja koriste usluge civilnog strelišta,
- f) o licima obučanim za rukovanje oružjem.

(6) Pravno i fizičko lice kojem je izdato odobrenje za držanje trofejnog oružja, odobrenje za sakupljanje i držanje starog oružja ili kolekcionarska dozvola dužno je voditi evidenciju o:

- a) sakupljenom trofejnog oružju,
- b) sakupljenom starom oružju i evidenciju oružja koje drži na osnovu kolekcionarske dozvole i
- c) evidenciju o sakupljenom hladnom, automatskom i poluautomatskom oružju i bitnim dijelovima iz kategorije A.

(7) Evidencije iz ovog člana čuvaju se trajno.

(8) Trgovci oružjem, posrednici, pravna i fizička lica koja se bave onesposobljavanjem oružja duži su u roku od 15 dana od dana prestanka obavljanja djelatnosti evidencije iz stava (2), (3) i (4) ovog člana dostaviti nadležnoj policijskoj stanici.

(9) Trgovci oružje, posrednici, pravna i fizička lica koja se bave onesposobljavanjem oružja dužni su odmah prijaviti nabavljanje i prodaju, odnosno izvršeno posredovanje oružja, bitnih dijelova i municije, odnosno izvršeno onesposobljavanje oružja u bazu podataka iz člana 70. ovog zakona.

(10) Obrasci, sadržaj i način vođenja evidencija iz ovog člana utvrđuju se pravilnikom koji donosi ministar Ministarstva na prijedlog policijskog komesara.

Član 70. **(Baza podataka)**

(1) Radi praćenja i identifikiranja vatrenog oružja, i bitnih dijelova, te radi razmjene podataka nadležnih organa, fizičkih i pravnih lica koji vode evidenciju u skladu sa odredbama ovog zakona, Uprava policije u roku od jedne godine od dana stupanja na snagu ovog zakona putem softverske aplikacije uspostavlja elektronsku bazu podataka za Kanton (u daljem tekstu: baza podataka).

(2) Baza podataka sadrži:

- a) vrstu, marku, model, kalibar i serijski broj svakog vatrenog oružja i oznaku na njegovom kućištu ili uvodniku metaka kao jedinstvenu oznaku koja služi kao jedinstveni identifikator svakog vatrenog oružja,
- b) serijski broj ili jedinstvenu oznaku na bitnim dijelovima, ako je drugačija od oznake na kućištu ili uvodniku metaka svakog vatrenog oružja,
- c) imena i adrese dobavljača i osoba koje nabavljaju ili posjeduju vatreno oružje, zajedno sa odgovarajućim datumom ili datumima,
- d) sva popravljavanja ili modifikacije vatrenog oružja zbog čega se mijenja njegova kategorija ili podkategorija, uključujući njegovo ovjereno onesposobljavanje ili uništenje, zajedno sa odgovarajućim datumom ili datumima.

(3) Podaci o vatrenom oružju i bitnim dijelovima, uključujući povezane lične podatke u bazi podataka čuvaju se u razdoblju od 30 godina nakon uništenja vatrenog oružja ili bitnih dijelova.

(4) Nakon proteka roka iz stav (3) ovog člana, podaci o vatrenom oružju i bitnim dijelovima, uključujući povezane lične podatke, brišu se iz baze podataka.

(5) Podaci iz baze podataka, na pismeno traženje moraju se dostaviti:

a) organima nadležnim za provođenje odredaba ovog zakona i organima nadležnim za carinske postupke u periodu do 10 godina nakon uništenja vatrenog oružja i bitnih dijelova,

b) organima nadležnim za sprečavanje, istragu, otkrivanje ili progon krivičnih dijela ili izvršavanja krivičnih sankcija u periodu do 30 godina nakon uništenja vatrenog oružja i bitnih dijelova.

(6) Brisanje podataka ne utječe na slučajeve u kojima su određeni lični podaci preneseni organu nadležnom za sprečavanje, istragu, otkrivanje ili progon krivičnih dijela ili izvršavanja krivičnih sankcija i upotrebljavaju se u tom određenom kontekstu, u skladu sa propisima kojima se uređuje zaštita ličnih podataka.

(7) Oblik, sadržaj i način vođenja baze podataka, na prijedlog policijskog komesara propisuje ministar Ministarstva.

Član 71.

(Uzimanje mehaničkog traga vatrenog oružja)

(1) Državni organi, ustanove, pravna i fizička lica koja prvi put registruju vatreno oružje, dužni su na poziv Uprave policije omogućiti uzimanje mehaničkog traga oružja, radi unosa u evidenciju o mehaničkom tragu oružja.

(2) U slučaju zamjene bitnih dijelova, vlasnik oružja dužan je u roku od 8 dana donijeti oružje radi ponovnog uzimanja mehaničkog traga.

(3) Vlasnik oružja kojem zbog tehničke neispravnosti nije moguće uzeti mehanički trag oružja, dužan je oružje onesposobiti ili predati policijskoj stanici na uništenje u skladu sa ovim zakonom.

(4) Poslove iz stava (1) ovog člana, kao i vođenje zbirke oružja i municije, će obavljati Uprava policije.

(5) Za uzimanje mehaničkog traga oružja iz stava (1) ovog člana ne naplaćuje se naknada.

DIO TREĆI - KAZNENE ODREDBE

Član 72.

(Sankcije)

(1) Sankcije koje se mogu izreći za krivična djela propisane ovim zakonom su: kazna zatvora, novčana kazna i mjera sigurnosti oduzimanje oružja.

(2) Sankcije koje se mogu izreći za prekršaje propisane ovim zakonom su: novčana kazna, zaštitna mjera oduzimanje oružja i municije, bitnih dijelova za oružje i isprava o oružju i zaštitna mjera zabrana vršenja djelatnosti.

Član 73.

(Krivična djela)

(1) Kaznom zatvora do tri godine, kaznit će se za krivično djelo:

a) ko bez važeće isprave o oružju nabavi, drži ili nosi oružje ili bitne dijelove ili municiju za oružje iz kategorije B,

b) ko proda oružje ili posreduje u trgovini oružjem ili bitnim dijelovima ili municijom oružja kategorije B fizičkom ili pravnom licu koje nema odobrenje za nabavljanje tog oružja,

c) ko prepravlja naprave sa ležištem municije za ispaljivanje sačme, zrna ili projektila djelovanjem zapaljivog potisnog sredstva,

d) trgovac oružjem ako nabavi oružje i municiju bez posebnog odobrenja nadležnog organa radi dalje prodaje,

e) ko popravlja ili prepravlja vazdušno, gasno, airsot i paintball naprave i reprodukcije oružja za ispaljivanje bojeve municije,

f) ko popravlja ili prepravlja oružje ili bitne dijelove oružja ili ko onesposobljava oružje bez odobrenja ili popravlja ili prepravlja ili onesposobljava oružje ili bitne dijelove oružja za koje nije izdata važeća isprava o oružju kategorije B ili ko onesposobljava oružje koje ne može biti predmet onesposobljavanja.

(2) Za krivična djela iz stava (1) ovog člana, obavezno se izriče i mjera sigurnosti oduzimanja oružja i municije, bitnih dijelova za oružje i isprava o oružju.

Član 74.

(Novčane kazne i zaštitne mjere za prekršaje fizičkih lica)

(1) Novčanom kaznom od 1.000,00 KM do 1.500,00 KM kaznit će se za prekršaj fizičko lice ako:

a) lice koje je u vrijeme izvršenja prekršaja navršilo 16 a nije navršilo 18 godina života, nabavi, drži i nosi električni paralizator snage ispod 10.000 volti, hladno oružje, vazdušno oružje čija je kinetička energija manja od 10,5 J ili je brzina projektila manja od 200 m/s i kalibra 4,5 mm, oružje sa tetivom čija je sila zatezanja manja od 450 N, odnosno čija je natezna težina manja od 101 libre i airsoft i paintball naprave (član 8. stav (9)),

b) lice koje je u vrijeme izvršenja prekršaja navršilo 16 a nije navršilo 18 godina života, nabavi, drži ili nosi sprej za omamljivanje (član 8. stav (10)),

c) nabavi, drži i trguje hladnim oružjem kojem je osnovna namjena napad ili nanošenje ozljeda ili nosi takvo oružje na javnom mjestu, osim u svrhu sportskog takmičenja (član 8. stav (4)),

d) drži ili nosi oružje kategorije C bez odgovarajuće potvrde o prijavi oružja (član 8. stav (6)),

e) nabavi, nosi ili drži oružje kategorije C, a nije navršilo 21 godinu života (član 8. stav (7)),

f) sakuplja staro oružje bez odobrenja nadležne policijske stanice (član 25. stav (1)),

g) ne čuva oružje i municiju na način da nije dostupno maloljetnom ili drugom neovlaštenom licu, koje nije zaključano i odvojeno u fiksnom metalnom ormaru, sefu ili sličnom spremištu koje se ne može otvoriti alatom uobičajene upotrebe (član 36. stav (1)),

h) ne donese na ispitivanje i tehnički pregled oružje po pozivu nadležne policijske stanice (član 36. stav (3)),

i) nosi oružje na javnim, vjerskim i sportskim okupljanjima, u obrazovnim, zdravstvenim i drugim javnim institucijama, ugostiteljskim objektima i prostorima koji se koriste za pružanje ugostiteljskih usluga, kao i prostorima gdje je javno istaknuta zabrana nošenja oružja (član 38. stav (1)),

j) nosi oružje na javnom mjestu na način koji može izazvati osjećaj fizičke ugroženosti, uznemirenosti ili negodovanja građana (član 38. stav (3)),

k) upotrebljava oružje na javnom mjestu i drugim mjestima čime ugrožava sigurnost ljudi i objekata, te narušava javni red i mir (član 38. stav (4)),

l) upotrebljava lovačko ili sportsko oružje izvan lovišta, odnosno strelišta ili drugih mjesta

koja su određena za vježbe gađanja (član 38. stav (6) i (7)),

lj) da na poslugu sportsko ili lovačko oružje licu koje nema oružni listi ili potvrdu o prijavi za oružje koje se daje na poslugu (član 39. stav (2)),

m) iznosi oružje i municiju van lovišta ili ne vrati organizaciji koja gazduje lovištem, oružje i neutrošenu količinu municije dobijenu na poslugu (član 42. stav (3) i (4)),

n) policijskom službeniku ne preda oružje, bitne dijelove oružja, municiju i isprave o oružju (član 50. stav (2)),

o) na poziv nadležene policijske stanice ne donese vatreno oružje radi uzimanja mehaničkog traga vatrenog oružja (član 71. stav (1)),

p) u slučaju zamjene bitnih dijelova vatrenog oružja u roku od osam dana ne donese vatreno oružje Upravi policije radi ponovnog uzimanja mehaničkog traga (član 71. stav (2)),

r) zbog tehničke neispravnosti ne onesposobi ili ne preda vatreno oružje na uništenje nadležnoj policijskoj stanici (član 71. stav (3)),

s) ne podnese zahtjev za zamjenu isprava o oružju (član 82. stav (2)).

(2) Novčanom kaznom od 1.000,00KM do 1.500,00 KM kaznit će se za prekršaj roditelj, usvojitelj ili staratelj:

a) lica mlađeg od 16 godina koje nabavi, drži i nosi električni paralizator snage ispod 10.000 volti, hladno oružje, vazdušno oružje čija je kinetička energija manja od 10,5 J ili je brzina projektila manja od 200 m/s i kalibra 4,5 mm, oružje sa tetivom čija je sila zatezanja manja od 450 N, odnosno čija je natezna težina manja od 101 libre i airsoft i paintball naprave, ako je izvršenje prekršaja posljedica njihovog propuštanja dužnog nadzora nad tim licem, a u mogućnosti su da takav nadzor vrše (član 8. stav (9)),

b) lica mlađeg od 15 godina koje nabavi, drži ili nosi sprej za omamljivanje, ako je izvršenje prekršaja posljedica njihovog propuštanja dužnog nadzora nad tim licem, a u mogućnosti su da takav nadzor vrše (član 8. stav (10)).

(3) Za prekršaje iz stava (1) ovog člana, pored novčane kazne, obavezno se izriče i zaštitna mjera oduzimanja oružja, bitnih dijelova, municije i isprava o oružju.

Član 75.

(Novčane kazne i zaštitne mjere za prekršaje fizičkih lica)

(1) Novčanom kaznom od 500,00KM do 1.000,00 KM kaznit će se za prekršaj fizičko lice ako:

a) neispravni ili dotrajali bitni dio oružja ili zamijenjeni tehnički ispravan dio oružja ne preda nadležnoj policijskoj stanici (član 19. stav (3)),

b) drži ili nosi oružje bez oružnog lista kada je za držanje tog oružja potreban oružni list ili na zahtjev policijskog službenika ili drugog ovlaštenog službenog lica Ministarstva ne omogući uvid u to oružje ili oružni list (član 21. stav (2)),

c) ako ne preda oružje, bitne dijelove, municiju i oružni list (član 21. stav (9)),

d) bez odobrenja drži trofejno oružje ili ga nosi ili upotrebljava, ili za ovo oružje drži ili nabavlja municiju (član 24. stav (1) i (6)),

e) ne prijavi nadležnoj policijskoj stanici nabavljanje oružja kategorije C u propisanom roku (član 27. stav (2)),

f) ne prijavi nadležnoj policijskoj stanici prodaju oružja kategorije C u propisanom roku (član 27. stav stav (5)),

g) zamijenjene tehnički neispravne i dotrajale dijelove vazdušnog oružja ne preda nadležnoj

policijskoj stanici (član 27. stav (6)),

h) u propisanom roku ne podnese zahtjev za registraciju vatrenog oružja radi izdavanja oružnog lista (član 31. stav (1)),

i) ne održava oružje u ispravnom stanju, nepravilno i neoprezno rukuje sa oružjem (član 35. stav (2))

j) nosi oružje pod uticajem alkohola, opojnih droga ili drugih omamljujućih sredstava u organizmu (član 35. stav (4))

k) nosi oružje i municiju koji su mu povjereni u vrijeme kada ne obavlja službu ili iznese oružje izvan područja, odnosno objekta koji se obezbjeđuje i čuva (član 40. stav 2)),

l) kao član streljačke organizacije koji nosi oružje van strelišta ili drugog terena određenog za vršenje vježbi gađanja, odnosno takmičenja u gađanju, bez potvrde streljaške organizacije o vršenju vježbi gađanja, odnosno takmičenja u gađanju (član 41. stav (2)),

lj) vlasnik oružja o izvršenoj popravci ili prepravci oružja u propisanom roku ne obavijesti nadležnu policijsku stanicu (član 61. stav (4)).

(1) Za prekršaje iz stava (1) tačka c), d), i), j) ovog člana pored predviđene novčane kazne, obavezno se izriče i zaštitna mjera oduzimanja oružja, bitnih dijelova, municije i isprava o oružju.

Član 76.

(Novčane kazne i zaštitne mjere za prekršaje fizičkih lica)

(1) Novčanom kaznom od 200,00 KM do 500,00 KM, kaznit će se za prekršaj fizičko lice koje:

a) ne izvrši odjavu oružja kod nadležne policijske stanice u roku od osam dana od dana prodaje (član 25. Stav (8)),

b) u propisanom roku ne prijavi nabavku optičkog nišana (član 28. stav (1) i (2)),

c) u slučaju smrti vlasnika oružja i municije u propisanom roku ne preda oružje, bitne dijelove, municiju i odgovarajuću ispravu nadležnoj policijskoj stanici (član 30. stav (1)),

d) u propisanom roku ne proda ili pokloni oružje i municiju, ne podnese zahtjev za izdavanje odobrenja za nabavljanje i držanje oružja, odnosno ne podnese prijavu za oružje iz kategorije C, ne podnese zahtjev za izdavanje odobrenja za držanje trofejnog oružja ili ne preda oružje nadležnoj policijskoj stanici na uništenje bez prava na naknadu (član 30. stav(3)),

e) u propisanom roku ne odjavi oružje koje je prodao ili poklonio (član 30. stav (8)),

f) u propisanom roku ne vrati nekorišteno odobrenje za nabavku i držanje vatrenog oružja i bitnih dijelova (član 31. stav (2)),

g) u propisanom roku ne obavijesti nadležnu policijsku stanicu o izvršenoj zamjeni oružja i ne podnese zahtjev za registraciju i izdavanje isprava o oružju (član 32. stav (3)),

h) u propisanom roku ne odjavi oružje i ne preda isprave o oružju (član 33. stav (3)),

i) ne preda na čuvanje oružje, bitne dijelove i municiju fizičkom licu koje posjeduje ispravu o oružju za takvu vrstu oružja ili ovlaštenom trgovcu oružjem kada napusti mjesto prebivališta ili boravišta duže od 6 mjeseci (član 37. stav (1)),

j) u roku od osam dana od dana predaje oružja, bitnih dijelova i municije ne obavijesti nadležnu policijsku stanicu (član 37. stav (2)),

k) van lovišta, odnosno strelišta drži, odnosno nosi vatreno ili vazdužno oružje bez futrole ili kovčega ili koje je napunjeno (član 38. stav (5)),

l) u propisanom roku ne prijavi nestanak ili krađu oružja, bitnih dijelova, municije ili isprava o oružju nadležnoj policijskoj stanici (član 43. stav (1)),

lj) u propisanom roku ne preda ispravu o oružju nadležnoj policijskoj stanici u slučaju nestanka ili krađe oružja i bitnih dijelova (član 43. stav (5)),

m) ne obavijesti nadležnu policijsku stanicu o pronalasku oružja, bitnih dijelova, municije ili isprava o oružju (član 44. stav (1)),

n) u propisanom roku ne prijavi promjenu prebivališta ili boravišta ili promjenu ličnog imena ili gubitak državljanstva (član 45.),

nj) ne preda nadležnoj policijskoj stanici vatreno oružje i bitne dijelove za koje ne postoji mogućnost popravke ili prepravke (član 46. stav (2)).

(2) Za prekršaje iz stava (1) tačke c), e), f), h), l) i n) ovog člana, pored predviđene novčane kazne, obavezno se izriče i zaštitna mjera oduzimanja oružja, bitnih dijelova i municije i isprava o oružju.

Član 77.

(Novčane kazne i zaštitne mjere za prekršaje pravnih lica i fizičkih lica registrovanih za obavljanje djelatnosti)

(1) Novčanom kaznom od 3.000,00 do 10.000,00 KM, kaznit će se za prekršaj pravno lice i fizičko lice registrovano za obavljanje djelatnosti ako:

a) nabavi, posjeduje, drži i trguje hladnim oružjem kojem je osnovna namjena napad ili nanošenje ozljeda, te nošenje takvog hladnog oružja na javnom mjestu, osim u svrhu sportskog takmičenja (član 8. stav (4)),

b) drži oružje bez odgovarajuće isprave o oružju (član 21. stav (2)),

c) povjeri rukovanje i korištenje oružja punoljetnom licu koje ne ispunjava propisane uslove (član 22. stav (2)),

d) proda oružje kategorije C fizičkom licu koje nije navršilo 21 godinu života (član 27. stav (7)),

e) u određenom roku ne prijavi nabavku optičkog nišana, ili koje u određenom roku ne prijavi otuđenje, nestanak ili gubitak snajpera (član 28. stav (1) i (2)),

f) ne obavijesti u propisanom roku nadležnu policijsku stanicu o prestanku potrebe za daljim držanjem oružja i municije ili ne vrati odobrenje za držanje oružja ili ne preda oružje (član 29. stav (1)),

g) u propisanom roku ne podnese zahtjev za izdavanje odobrenja za držanje oružja (član 31. stav (1)),

h) u propisanom roku ne obavijesti nadležnu policijsku stanicu o zamjeni vatrenog oružja (član 32. stav (3)),

i) u propisanom roku ne prijavi prenos prava vlasništva na oružju nadležnoj policijskoj stanici (član 33. stav (3) i (4)),

j) ne čuva oružje i municiju na način da nije dostupno maloljetnom ili drugom neovlaštenom licu, koje nije zaključano i odvojeno u fiksnom metalnom ormaru, sefu ili sličnom spremištu koje se ne može otvoriti alatom uobičajene upotrebe (član 36. stav (1)),

k) ne čuva oružje i municiju u odgovarajućem prostoru koji se nalazi u mjestu sjedišta vlasnika (član 36. stav (2))

l) ne donese na ispitivanje i tehnički pregled oružje po pozivu nadležne policijske stanice (član 36. stav (3)),

lj) povjeri nošenje oružja i municije fizičkom licu koje nije član lovačke ili streljačke

organizacije, odnosno koje ne obavlja poslove čuvanja šuma, lovišta ili ribolovišta ili poslove zaštite i koje ne ispunjava uslove za nošenje oružja propisane ovim zakonom, Zakonom o šumama i Zakonom o agencijama i unutrašnjim službama za zaštitu ljudi i imovine ili ne obavijesti nadležnu policijsku stanicu o licu kome je povjereno oružje (član 40. stav (1) i (4)),

m) kao streljačka organizacija da na upotrebu oružje i municiju licu koje nije njen član ili lice koje se obučava u rukovanju oružjem (član 41. stav (1)),

n) da oružje na poslugu članovima domaćih i inostranih lovačkih organizacija koji ne ispunjavaju propisane uslove ili da oružje na poslugu duže od 8 dana ili ne izda potvrdu za nošenje oružja i municije (član 42. stav (1) i (2)),

nj) ne prijavi u propisanom roku nestanak ili krađu oružja, bitnih dijelova, municije ili isprava o oružju (član 43. stav (1)),

o) ne preda oružje koje je dotrajalo u tolikoj mjeri da njegova upotreba može ugroziti bezbjednost ljudi, a koje se ne može popraviti ili prepraviti ili ne preda zamijenjene tehnički neispravne dijelove vatrenog oružja (član 46. stav (1) i (3)),

p) bez odobrenja nadležne policijske stanice pusti u radi civilno strelište (član 51. stav (1)),

r) na civilnom strelištu da vatreno oružje na korištenje fizičkom licu koje nema odgovarajuću ispravu o oružju (član 53. stav (1)),

s) dozvoli licu koje nema odgovarajuću ispravu o oružju da može vršiti gađanje bez nadzora ovlaštenog lica strelišta ili sa oružjem i municijom koje nije vlasništvo civilnog strelišta (član 53. stav (3)),

t) dozvoli licu pod dejstvom alkohola, opojnih droga ili drugih omamljujućih sredstava ili koje je u takvom stanju da nije u mogućnosti shvatiti značenje svog postupanja ili ako njegovo psihofizičko stanje ukazuje na nesposobnost rukovanja oružjem, pristup civilnom strelištu ili mu omogućiti izvođenje gađanja (član 53. stav (4)),

u) se bavi trgovinom oružje, bitnim dijelovima i municijom bez odobrenja nadležne policijske stanice (član 55. stav (1)),

v) prilikom prodaje oružja ili bitnih dijelova u propisanom roku od 8 dana ne obavijesti nadležnu policijsku stanicu (član 57. stav (1)),

z) o izvršenoj popravci ili prepravci oružja vlasniku ne izda potvrdu ili u propisanom roku ne obavijesti nadležnu policijsku stanicu (član 61. stav (4)),

aa) primi na popravljavanje ili prepravljavanje oružje za koje nije izdat oružni list ili odobrenje za držanje oružja (član 62. stav (1)).

ab) u propisanom roku ne obavijesti nadležnu policijsku stanicu o onesposobljavanju oružja (član 65. stav (1)),

ac) na poziv nadležne policijske stanice ne donese vatreno oružje radi uzimanja mehaničkog traga vatrenog oružja i unosa u evidenciju o mehaničkom tragu vatrenog oružja (član 71. stav (1)),

ad) u propisanom roku ne obavijesti Upravu policije o izvršenom onesposobljavanju oružja (član 65. stav (1)),

ae) ne omogućiti obavljanje nadzora ili ne omogućiti uvid traženu dokumentaciju ili ne pruži potrebne podatke ili obavijesti (član 67. stav (2)),

af) ne podnese zahtjev za zamjenu isprava o oružju do isteka roka naznačenog u ispravi (član 82.) i

ag) ne uskladi svoje poslovanje sa odredbama ovog zakona u propisanom roku (član 88.))

(2) Za prekršaje iz stava (1) tačke f), i), o), r), s), u), aa) i ad) ovog člana, pored predviđene novčane kazne, obavezno se izriče i zaštitna mjera oduzimanja oružja, bitnih dijelova i municije i isprava o oružju.

(3) za prekršaje iz stava (1) ovog člana, kaznit će se novčanom kaznom od 300,00 do 1.500,00 KM i odgovorno lice u pravnom licu.

(4) Za prekršaje iz stava (1) tačke a), b), l), p), s), u), aa), ab) i ad) ovog člana, uz novčanu kaznu može se izreći i zaštitna mjera zabrana obavljanja djelatnosti u trajanju od 6 mjeseci.

Član 78.

(Novčane kazne i zaštitne mjere za prekršaje pravnih lica i fizičkih lica registrovanih za obavljanje djelatnosti)

(1) Novčanom kaznom od 1.000,00 do 3.000,00 KM, kaznit će se za prekršaj pravno lice i fizičko lice registrovano za obavljanje djelatnosti ako:

- a) prije datum isteka važnosti isprave o oružju ne podnese zahtjev za zamjenu isprave o oružju (član 21. stav (7)),
- b) ne izvrši odjavu oružja kod nadležne policijske stanice u propisanom roku (član 25. stav (8)),
- c) ne prijavi nadležnoj policijskoj stanici nabavljanje oružja kategorije C u propisanom roku (član 27. stav (2)),
- d) ne vrati odobrenje za držanje oružja u propisanom roku (član 31. stav (2)),
- e) ne obavijesti nadležnu policijsku stanicu o izvršenoj zamjeni oružja i ne podnese zahtjev za registraciju i izdavanje isprava o oružju u propisanom roku (član 32. stav (3)),
- f) ne obavijesti nadležnu policijsku stanicu o izvršenom prenosu prava vlasništva u propisanom roku (član 33. stav (3)),
- g) sa vatrenim oružjem ne postupa sa naročitom pažnjom (član 35. stav (1)),
- h) ne održava oružje u ispravnom stanju, nepravilno i neoprezno rukuje sa oružjem (član 35. stav (2)),
- i) ne izda potvrdu o nošenju oružja i municije fizičkom licu ili o izdanoj potvrdi ne obavijesti nadležnu policijsku stanicu (član 40. stav (4)),
- j) ne prijavi nestanak ili krađu oružja, bitnih dijelova, municije ili isprava o oružju u propisanom roku (član 43. stav (1)),
- k) ne preda ispravu o oružju nadležnoj policijskoj stanici u propisanom roku (član 43. stav (5)),
- l) ne prijavi promjenu sjedišta ili naziva u propisanom roku (član 45. stav (1) i (3)),
- lj) prilikom prodaje oružja ne zadrži jedan primjerak odobrenja za nabavljanje oružja ili na drugi ne stavi zabilješku o izvršenoj prodaji (član 57. stav (2))
- m) o izvršenoj prodaji municije ne obavijesti nadležnu policijsku stanicu u propisanom roku (član 57. stav (3)),
- n) ne vodi propisane evidencije (član 69)),
- nj) u slučaju zamjene bitnih dijelova vatrenog oružja u roku od 8 dana ne donese vatreno oružje nadležnoj policijskoj stanici radi ponovnog uzimanja mehaničkog traga vatrenog oružja i unosa u evidenciju o mehaničkom tragu vatrenog oružja (član 71. stav (2))
- o) ne zamjeni u propisanom roku isprave o oružju (član 82.).

(2) Za prekršaje iz stava (1) tačke b), g), n), o) i p) ovog člana, pored predviđene novčane kazne, obavezno se izriče i zaštitna mjera oduzimanja oružja, bitnih dijelova i municije i isprava o oružju.

(3) za prekršaje iz stava (1) ovog člana, kaznit će se novčanom kaznom od 200,00 do 1.000,00 KM i odgovorno lice u pravnom licu.

(4) Za prekršaje iz stava (1) tačke a), b), l), p), s), u), aa), ab) i ad) ovog člana, uz novčanu kaznu može se izreći i zaštitna mjera zabrana obavljanja djelatnosti u trajanju od 6 mjeseci.

DIO ČETVRTI– PRIJELAZNE I ZAVRŠNE ODREDBE

Član 79.

(Legalizacija i amnestija oružja)

(1) Lice koje na dan stupanja na snagu ovog zakona posjeduje oružje kategorije B koje prema ranije važećim propisima nije registrovano, takvo oružje mora odmah predati nadležnoj policijskoj stanici.

(2) Lice koje dobrovoljno preda oružje iz stava (1) ovog člana neće odgovorati za nelegalno posjedovanje.

(3) Lice iz stava (1) ovog člana može u roku od 12 mjeseci od dana stupanja na snagu ovog zakona, nadležnoj policijskoj stanici podnijeti zahtjev za izdavanje isprave o oružju, pri čemu nije dužno da dokazuje porijeklo oružja.

(4) Do okončanja postupka po zahtjevu iz stava (3) ovog člana, oružje se čuva u nadležnoj policijskoj stanici.

(5) Isprava o oružju neće se izdati licu koje ne ispunjava uslove iz člana 11. stav (3) i (4) ovog zakona, kao i kad se oružje potražuje od nadležnih organa i u slučaju da je oružje već registrovano.

(6) U slučaju iz stava (5) ovog Zakona nadležna policijska stanica će donijeti rješenje o oduzimanju oružja.

(7) Nakon pravosnažnosti rješenja iz stava (6) ovog člana, oružje će se dostaviti Komisiji iz člana 49. stav (8) radi uništenja.

Član 80.

(Oduzimanje i dobrovoljna predaja oružja kategorije A)

(1) Lice koje dođe u posjed oružja, bitnih dijelova i municije kategorije A, mora takvo oružje, bitne dijelove i municiju, uz prethodnu najavu, dobrovoljno predati nadležnoj policijskoj stanici.

(2) O vrsti i količini predatog oružja, bitnih dijelova i municije iz stava (1) ovog člana, nadležna policijska stanica izdaje odgovarajuću potvrdu.

(3) Nadležna policijska stanica dužna je voditi posebnu evidenciju o dobrovoljno predatom oružju i municiji.

(4) Ako protiv lica iz stava (1) ovog člana, prije dobrovoljne predaje oružja, bitnih dijelova i municije kategorije A, nije zaprimljena prijava zbog nedozvoljenog nabavljanja, posjedovanja, držanja ili nošenja, trgovine i pregovaranja ili ugovaranja transakcija za kupovinu ili prodaju vatrenog oružja, bitnih dijelova ili municije ili opskrbe njima ili dogovaranje transfera vatrenog oružja, bitnih dijelova ili municije, neće se pokretati prekršajni ili krivični postupak.

(5) U slučaju da lice iz stava (1) ovog člana dobrovoljno ne preda oružje, bitne dijelove i municiju, nadležna policijska stanica će postupiti u skladu sa odredbama Krivičnog zakona Federacije Bosne i Hercegovine ("Službene novine FBiH" broj: 36/03, 21/04-ispr., 69/04, 18/05, 42/10, 42/11, 59/14, 76/14, 46/14, 75/17 i 31/23).

(6) Oružje, bitne dijelove i municiju kategorije A, nadležna policijska uprava će oduzeti i kad o istima nije odlučeno u sudskom postupku ili kad se u sudskom postupku optuženi ne proglasi krivim, odnosno ako ne dođe do pokretanja krivičnog postupka, o čemu se donosi posebno rješenje.

(7) Oružje, bitni dijelovi i municija kategorije A će se uništiti.

Član 81. (Provedbeni propisi)

U roku od godinu dana od dana stupanja na snagu ovog zakona, na prijedlog policijskog komesara ministar Ministarstva će donijeti propise o:

- a) Pravilnik o izgledu i sadržaju obrasca isprava o oružju i zahtjeva za izdavanje isprava o oružju i drugih dokumenata (član 10. stav (3)),
- b) Pravilnik o postupku rješavanja zahtjeva za izdavanje odobrenja za nabavljanje i držanje oružja, izdavanje i zamjena isprava o oružju, kao i postupak izdavanja potvrda obavještenja i drugih dokumenata (član 10. stav (4));
- c) Pravilnik o postupku rješavanja zahtjeva za provođenje obuke u rukovanju oružjem, odobrenja za obavljanje djelatnosti (trgovina, popravljavanje ili prepravljavanje i onesposobljavanje oružja) i odobrenja za osnivanje civilnih streljišta (član 10. stav (4));
- d) Pravilnik o imenovanju i načinu rada komisija i drugih učesnika u postupku ocjene ispunjavanja uslova i opravdanosti zahtjeva za izdavanje odobrenja i isprava o oružju (član 10. stav (5)),
- e) Pravilnik o utvrđivanju zdravstvene sposobnosti za držanje, posjedovanje i nošenje oružja (član 14. stav (5)),
- f) Pravilnik o programu obuke, osposobljavanju i ocjeni osposobljenosti za rukovanje oružjem i poznavanje propisa u vezi držanja, čuvanja i nošenja oružja i municije, imenovanje, sastav i način rada komisija (član 15. stav (5)),
- g) Pravilnik o prostornim i tehničkim uslovima za čuvanje, smještaj i upotrebu oružja i municije na civilnim streljštima, broj i vrsta oružja u vlasništvu civilnog streljišta, način korištenja oružja na civilnom streljištu i vođenje civilnog streljišta (član 52. stav (1)),
- h) Pravilnik o smještaju i čuvanju oružja i municije (član 60. stav (2))
- i) Pravilnik o onesposobljavanju vatrenog oružja (član 65. stav (3)),
- j) Pravilnik o imenovanju i sastavu, načinu rada i nadležnostima Komisije za nadzor (član 67. stav (4)),
- k) Pravilnik o obrascima, sadržaju i načinu vođenja evidencija policijske stanice (član 68. stav (3)),
- l) Pravilnik o obrascima, sadržaju i načinu vođenja evidencija pravnih i fizičkih lica registrovanih za obavljanje djelatnosti, uključujući i sportske streljačke i lovačke organizacije (član 69. stav (10)),
- lj) Pravilnik o obliku, sadržaju i načinu vođenja elektronske baze podataka za Zeničko-dobojski kanton (član 70. stav (7)).
- m) Pravilnik o obrascu i sadržaju obrasca potvrde i evidencije o potvrdama koje državni organi i druga pravna lica uključujući i sportske streljačke i lovačke organizacije, organizacije koje gazduju lovištem, izdaju licu kome povjeravaju oružje i municiju (član 40. stav (6) i član 42. stav (7)).

Član 82. (Važenje i zamjena oružnih listova izdatih u skladu sa ranijim propisima)

(1) Isprave o oružju izdate prema ranijim propisima važe do isteka roka naznačenog u ispravi.

(2) Lica koja u trenutku stupanja na snagu ovog zakona imaju oružni list izdat u skladu sa Zakonom o nabavljanju, držanju i nošenju oružja i municije-Prečišćeni tekst („Službene novine Zeničko-dobojskog kantona“ broj: 9/13, 1/14 i 13/18), a čiji rok važenja je istekao, odnosno imaju odobrenje za držanje oružja čiji rok nije propisan, dužna su podnijeti zahtjev za izdavanje oružnog lista odnosno odobrenja za držanje vatrenog oružja u skladu sa ovim zakonom, a najkasnije devet mjeseci od dana stupanja na snagu ovog zakona.

(3) Postupak zamjene oružnog lista se provodi u skladu sa članom 21. ovog zakona.

Član 83.

(Započeti postupci)

Svi postupci koji su započeti a nisu okončani do dana stupanja na snagu ovog zakona okončat će se u skladu s ovim zakonom.

Član 84.

(Zaštita podataka)

Svi subjekti koji na bilo koji način primjenjuju odredbe ovog zakona, dužni su da prikupljaju, pohranjuju i obrađuju podatke u skladu sa propisima kojima se uređuje zaštita ličnih podataka i zaštita tajnih podataka.

Član 85.

(Uspostavljanje elektronske baze podataka)

U roku od jedne godine od dana stupanja na snagu ovog zakona, Uprava policije će uspostaviti elektronsku bazu podataka iz člana 70. ovog zakona.

Član 86.

(Ravnopravnost spolova)

Gramatička terminologija u ovom zakonu podrazumijeva uključivanje lica oba spola.

Član 87.

(Prestanak važenja)

(1) Danom stupanja na snagu ovog zakona, prestaje da važi Zakon o nabavljanju, držanju i nošenju oružja i municije - Prečišćeni tekst („Službene novine Zeničko-dobojskog kantona“, broj: 9/13, 1/14 i 13/18).

(2) Podzakonski akti doneseni na osnovu zakona iz stava (1) ovog člana ostaju na snazi do donošenja novih podzakonskih akata a najduže godinu dana od dana stupanja na snagu ovog zakona.

Član 88.

(Usklađivanje djelatnosti)

(1) Pravno lice i fizičko lice registrovano za obavljanje djelatnosti iz člana 51., 55., 61. i 63. ovog zakona dužno je svoje poslovanje uskladiti sa odredbama ovog zakona i odgovarajućih provedbenih podzakonskih propisa iz člana 79. ovog zakona u roku od devet mjeseci od dana stupanja na snagu ovog zakona.

(2) Pravnom i fizičkom licu registrovanom za obavljanje djelatnosti, koje u roku iz stava (1) ovog člana, ne podnese zahtjev u cilju usklađivanja poslovanja sa odredbama ovog zakona, nadležna policijska stanica će oduzeti odobrenje za rad.

Član 89.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Zeničko-dobojskog kantona".

Broj:

PREDSJEDAVAJUĆI SKUPŠTINE

Datum,
Zenica

Ćazim Huskić